




*Deux Voyages & Memoires de la Ligue. P. 1. p. 361. à 443. P. 2. Sur le voyage de  
au paravant & jusqu'à juillet 1586. & au voyage de Rouenno p. 1. 9. p. 205.*  
DISCOVERS 475.

**DV PROGRES**  
**DE L'ARMEE DV ROY**  
**EN GVIENTTE, COMMANDEE**  
**par Charles de Lorraine, Duc**  
**de Mayne, Pair & grand**  
**Chambelan de**  
**France,** <sup>3 octob.</sup> <sup>1586.</sup> <sup>p. 6.</sup>



A PARIS.

Chez Nicolas Niuelle, demeurant à la  
ruë Saint Iacques, à l'enseigne  
des deux Colomnes.

1586.

*Avec privilege du Roy.*

THE NEWBERRY  
LIBRARY

C25P

F

39

.326

1586cy

## LES NOMS DES VILLES

& Chasteaux occupez par les Huguenotz,  
qui ont esté remis en l'obeissance du Roy,  
par l'armée de Guienne.

La ville & Chasteau de Montignac leconte

La ville de Tulle,

Le Chasteau de Ionzac.

Le fort de Gagnac.

Le chasteau de Commiac

La ville de Beaus lieu

Les fortz d'Argentat

Le chasteau de MontValex. p. 33.

Le chasteau de Rocq

Le chasteau de casteln p. 46.


La ville de sainte Bazille p. 52.

La ville de Monsegur. p. 64.

La ville de castillon. p. 93.

Le chasteau de Puynormand. p. 100.

Le fort de Minzac. p. 100.



# DISCOVRS DV PRO- GRES DE L'ARMEE DV ROY

*en Guienne, commandée par Charles de  
Lorraine Duc de Mayne, Pair &  
Grand chambelan de France.*



LE ROY par son Edict du mois  
de Iuillet de l'an mil cinq cens  
quatre vingts & cinq, ayat or-  
donné qu'en son Roiaume des-  
ormais il ny auroit autre exerci-  
ce de religion, que de la Ca-  
tholique, Apostolique & Romaine: de la-  
quelle dans six mois prochains ses subiects &  
regnicoles huguenotz, feroient profession  
pardeuant leur Curé ou Vicaire, permettoit  
neantmoins à ceux qui ne se voudroient de-  
partir de leurs opinions en la religion, de se  
retirer hors du Royaulme, de iouir de leurs  
biens ou de les vendre: vouloit aussi que les  
Villes, qui auoient esté cy deuant baillées aux  
huguenots pour leur seureté, feussent par eux  
delaisées libres, & que les garnisons qu'ils y  
auoyét en sortissent, mais sa majesté preuoyant



*Reding*  
que les huguenotz n'obeïroiēt que tant qu'ils y seroyent contrains, ordōna que les deux regimens des Suiffes, que peu de mois auparauāt elle auoit faict entrer dans son Roiaulme iroyent ſçauoir eſt celuy du colonnel redhit en Guienne, avec l'armée qu'elle y deſtinoit ſoubs la conduicte du Duc du Mayne : & le regiment du colonnel Heild avec quelques autres forces, iroyent en d'Aulphiné ſoubs la conduicte du Sieur de la Valette, Dés le mois de Mars, de la meſme année mil cinq cens quatre vingts & cinq, les Huguenots auoient prins les armes, & tenoient la campagne, publiās eſtre authoriſez du Roy, parce que contre la volonté de ſa majeſté, (comme ils diſoient) aucuns Princes Catholiques prenoiēt auſſi les armes, pour ſoppozer toutes fois a l'execution des reſolutions, prinſes en l'aſſemblée faite par les Huguenots à Mōt<sup>\* m. n.</sup> auban, au mois de Septembre, de l'an mil cinq<sup>\* m. n.</sup> cens quatre vings & quatre, & confirmées en vne autre plus ſolēne aſſemblée, faicte à Meildelbourg, ou ſe trouuarent les deputez de to<sup>\* m. n.</sup> les Roys, Princes & communautez des deuoiſ de la religion Catholique: Aucuns ſoldats Catholiques, nourris en la diſſolutiō de la militie de c'eſt aage, & leſquels on a ceſte occaſion, ne pouuoient trouuer ſeureté de leurs perſonnes enuers la iuſtice, n'y ſupport enuers les Princes Catholiques, furent prati- quez & appointez par le Roy de Nauarre, du

nombre desquels estoit le Capitaine la Maurie, qui aux derniers troubles d'Anuers auoit mené en Flandres, quelques troupes de François, Cela Maurie assembla lors sept à huit cens hommes de pied, avec lesquels durant l'esté de l'an mil cinq cens quatre vingt & cinq, il rauagea le plat pays de Perigord, le hault & bas Limosin, le Quercy, & l'Agenois. Le sieur Marechal, de Matignon, gouuerneur de la Guiéne, residoit lors à Bordeaux, avec lequel estoient les regimens de Puyferat, de huit enseignes de gens de pied, celui de Sarliaç, des Bories, de cinq enseignes, & plusieurs autres faisant le nombre de quatre mil hommes de pied, & quelques compagnies de gens d'armes, qui tenoient aussi les champs: viuant toutesfois si doucement avec les Huguenots, & ceux de leur party, que les deux forces durant ce temps, ont souuent logé ensemble dans mesme vilage sans ce mesfaire, de tant que ledict sieur Marechal de Matignon, disoit auoir les mains liées, pour n'auoir commandement du Roy de leur courir sus, attendant que le temps qu'estoit donné aux Huguenotz, par le dict fust expiré, ce pendant les Souiffes du regiment de Redhit marcherent iusques a Coufoulan, ou ils se iournerent, iusques à ce que les sieurs de Lemoncourt, de Pougny des Rambouilliers, & le President Brulart, feussent de retour deuers la maiesté, & luy eussent fait entendre la res-

ponce du Roy de Nauarre, vers lequel le Roy  
 les auoit enuoiez, pour luy declairer sa reso-  
 lution prinse par le dernier Edict, & laquelle  
 il deliberoit de faire executer, par les moyens  
 que Dieu luy a donnez. Ceste responce estant  
 du tout contraire au desir du Roy, & à la te-  
 neur de son Edict, enuiron la fin du mois  
 d'Octobre, le Duc du Mayne, partit de Paris, <sup>04 oct</sup> 1588  
 congedié du Roy pour aller commander à  
 l'armée. Les forces des Huguenotz, auoyent  
 l'esté couru toute la Guienne, criant que la  
 maison de Guyse leur suscitoit ceste guerre,  
 non pour zeile de religion, mais pour entre-  
 prendre sur la courōne, dequoy le Roy estoit  
 si bien esclairey, que forcéement (disoyēt-ils)  
 sa majesté entroit en ceste guerre, requerant  
 les parens, aliez, amys & anciens seruiteurs  
 du Roy de Nauarre, de les assister Iusques à la  
 publication de cest Edict, plusieurs se lais-  
 soyent persuader, & presumoient de la vo-  
 lonté du Roy autrement qu'il n'estoit: toutes-  
 fois durant cetemps, les portes des villes feu-  
 rent tousiours closes au Roy de Nauarre, & à  
 ceux des party, iugeant vn chacun tous ses  
 bruietz faux, & pretextes Huguenotiques, &  
 du tout contraires au zeile sainct, que sa maje-  
 sté a, à la manutention de la religiō de ses pe-  
 res, & aux hereditaires comportemens de la  
 maison de Guyse enuers Dieu, & leur Prince  
 Durant la recolte des viures, le Prince de Cō-



dé & les Rochelois, auoyent bouclé de cypress Brouage, qu'il estoit en grande necessité de viures, & en d'anger de ce perdre: d'où le Prince retira ses forces, pour secourir le chasteau de la ville d'Angiers, que quinze soldats auoyent surprins, par la pratique du Capitaine Halot, qui auoit commandé dans ce chasteau, du viuât de feu monseigneur le Duc d'Alançon & d'Anjou, frere de nostre Roy, cestuy Halot estimant d'asseurer la prise du dict chasteau, & mettre les habitans de la ville d'Angiers, hors de soubçon de ceste surprise: alla dans icelle, auouant la prise du Chasteau, & maintenant l'auoir faict exécuter par commandement de sa majesté, dequoy n'estant auoué du Roy, il fut par la iustice d'Angers exécuté a mort sur vne rouie. Toute la Noblesse d'Anjou, & des pays circonuoisins acourut dans la ville d'Angers pour la sauuer, & le Roy fit partir les Ducz de Joyeuze, d'Espernon, & le Sieur Marechal de Biron, & ce qu'estoit autour de sa personne, pour en diligence la secourir, car le chasteau est des plus fors qui soyent en ce Royaume, & manda aussi sa majesté au Duc du Mayne qui estoit lors arriué à Orleans, de prendre le chemin d'Angiers, & commanda que le regimēt des Souisses de Heild, qui estoit d'estiné pour le Dauphiné, tournast visàge de ce mesme

costé le Prince de Condé, qui auoit passé la riuere de Loyre, avec quinze cens hommes de pied, & cinq cés cheuaulx, n'ayant peu entrer dans Angers cerchoit à la repasser, sur le bord de laquelle voyât les troupes des susdits Sieurs qui s'estoyent assemblez, sans coup frapper, les siens ce debendarent, qui feurent, fuiuis & deffaiets, partie par les Albanois & cheuaux legiers, que le Sieur Sacromoro de Birague conduisoit, & partie par les payfans du pays. Le succes d'Angiers desilla, les yeulx de ceux que les huguenots troubloient, par les faux bruits qu'ils faisoient courir de l'assistance de sa Maiesté à leurs desseings. Le Sieur Marechal de Matignon, qui pendant l'exploict d'Angiers auoit esté commandé par le Roy, de secourir Broüage, avec le regiment des Souisses du Colonel redhit, qui seiournoit à Confoulan & quelques autres regimés de gens de pied, qui estoient venus de France, auoit marché de ce costé, & leuë des mains des ennemis les forces qui boucloiët Broüage: d'ou il partit pour approcher la riuere de Dordogne, ayant eu aduis que le Viconte de Turenne auoit forcé la ville du Tulle, faisant le quel chemin il miet dās la villē de Taillebourg cinq cens soldats, laissant dans le chasteau de Taillebourg qui est tres fort, la Dame de la Trimouille Dame du lieu, la fille de laquelle peu de iours auparauant auoit espousé le Prince de Condé. Le Viconte de

Turenne dès le mois de Septembre auoit assemblé toutes les forces des huguenots & de leurs adherans, qui faisoient quatre à cinq mil hommes de pied, fort pietres d'armes & d'habits, avec lesquels il logea trois sepmaines és enuiron & iusques aux portes de la ville de Perigueux, non sans soubçon d'auoir quelques intelligences dans la ville pour la surprendre: La vigilance des habitans ne permettant qu'il y peut entreprendre, il mena ses troupes à Montignac le Conte, sur la riuere de Vezere, dou il tascha d'executer de nuit vne entreprise qu'il auoit sur la ville de Briue, par l'intelligence du premier Consul, à quoy n'ayant aussi peu paruenir, il mena ses troupes vers la ville de Tulle, d'ou approchant aucuns des Capitaines de ses troupes, qui estoient voisins de Tulle, & qui peu de iours auparauant y auoyent commandé comme Catholiques, se saisirent de la porte d'un des faux-bourgs, laquelle fut aussi tost remplie d'ennemis: les faux-bourgs sont plus grands, mieux bastis & plus habitez que la ville, au bruit de l'alarme aucuns des citoyens du faux bourg se meirent en defense, les autres ce iettarent dans la ville: les huguenots durât deux iours qu'ils feurent dans les faux bourgs, mettoiēt le feu aux maisons, les femmes, enfans & familles y auoyent esté surprins, pour les sauuer, les habitans refugies dans la ville, composarēt avec le Viconte de Turenne, & racheparent leurs

perſonnes & le pillage de la ville d'une nota-  
 ble ſomme de deniers, laquelle fuſt prompte-  
 ment fournie par les habitans, & les portes  
 de la ville ouuertes aux huguenots, qui cõtre  
 leur capitulation, exercarent toutes ſortes de  
 ſacrileges & cruautez contre ſes pauvres cit-  
 toyens: auſquels la Maurie fuſt donnẽ pour  
 gouverneur, qui commẽça de courir iuſques  
 aux portes de Limoges & de Clermond en au-  
 uergne, & de leuer par tout ẽs enuironſ les  
 tailles du Roy, & des contributions. Les con-  
 ſuls de Tulle, trois mois auant leur perte, pre-  
 ſentans ce malheur auoient pluſieurs fois  
 enuoyẽ vers le Sieur Mareſchal de Matignon,  
 luy faiſant entendre les aduis qu'ils auoient  
 des deſſains que les huguenots faiſoient ſur  
 eux, & le requerant de leur ordonner vn gou-  
 verneur, & quelque nombre de ſoldats: lequel  
 eſtant lors occupẽ à ſauuer la ville D'aagen  
 qui eſtoit ſur le point de ſe perdre, ils eurent  
 recours au Roy, qui leur ordonna quatre mil  
 eſcus a prendre ſur les deniers des tailles de la  
 recepte de Tulle, pour les emploier à l'entre-  
 tenement de quelques gens de guerre, a quoy  
 ils n'eurent le loyſir de pouruoir. Le Duc du  
 Maine aprochant la ville de poiẽtiers, ayant  
 entẽdu que Tulle eſtoit aſſiegẽ, y depeſcha en  
 diligence, le Sieur D'hauteſort Lieutenant du  
 Roy en Limoſin, qui eſtoit pres de ſa perſon-  
 ne, & luy bailla vne compagnie d'arquebu-



fiers à cheval conduicte par le Sieur Rodomont de Birague, & bien qu'en chemin le Sieur D'hautefort sceust que Tulle estoit perdu, il ne laissa de passer outre, & pourueut à la seureté des villes de Briue & d'vzerche qui estoient lors en danger de se perdre. Le sac de la ville de Tulle arma tresbien les forces des huguenots, & les accommoda de toutes choses, sans laquelle fortune, ils estoient sur le point de se rompre, à ce contrains de misere & necessité. Presque en ce mesme temps, la Dame de la trimouille receut d'as le chasteau de taillebourg des troupes des huguenots, qui partirent de saint lehan & de Pons, lesquels, firent ceux qu'on auoit laissez dans la ville de Taillebourg, s'en rédirét maistres & en tuarét plusieurs. Sur la fin du mois de Nouembre le Duc du Mayne se rendit à Lusignan, avec le Regiment du Colonel Heild, & aucuns Regimens de gens de pied François. Au bruit de l'arriuee de ceste armée en Guiéne, vn chacun estoit esleué en tresgrande esperance de voir de grands changemens, les Catholiques rendoient graces à Dieu, d'auoir inspiré le Roy de faire vne telle armée, & si heureuse electiō, que du Duc du Maine pour la commander, sous lequel ils espeiōiēt pareil succes a ceux qu'il auoit executez en D'auphiné & à Brouage pour mesmes raisons les huguenots estoient fort bas de cœur, aucuns d'entre eux obeissans

aux edicts du Roy, abiuroient l'huguenotisme, les autres pour faire fraude a l'edict, faisoient demander leurs chasteaux en garde par des Catholiques, qui en prenoient commission des seneschaux desprouinces. Les deputez de Rouergue, de Quercy, de Limosin, de Perigord, de Saintonge & D'angoulmois, se rencontrerēt en mesme temps aupres du Duc du Mayne, chacun offrant au nom de sa prouince, viures, argent, & soldats pour ayder a l'entretienement de l'armée, si le Duc la vouloit mener chez eux: ils furent tous remis a auoir responce lors que le Duc du Mayne, & le Marechal de Matignon seroient ioincts. L'armée partant de Lusignan print le chemin d'aigre, de Iarnac, & de Chasteauneuf sur Charente, auquel lieu de Chasteauneuf le Sieur Marechal de Matignon arriuant le mesme iour, & plustost que le Duc du Maine, passa le pont & luy fust audenant. C'estoit enuiron le vingt-huictiesme de Decembre. Les propositions des deputez furēt recueillies & enuoiées au Roy, & attendant la responce de sa Maiesté on fist les festes de Noel a Chasteauneuf: Les deputez de Saintonge & D'angoulmois remonstroient: que les premieres places que les huguenots tenoient de ce costé, estoient Saint Iean D'angeli, Pons & Taillebourg, que si l'armée passoit outre sans les forcer, se seroit donner a entendre qu'elle n'estoit suf-



fisante d'ataquer telles places, qui augmen-  
 teroit le cœur aux huguenots, qu'il falloit  
 pied a pied purger le Royaume, & le reduire a  
 sa deuë obeissance enuers le Roy: ce conseil  
 estoit fort à propos si lors on n'eust esté au  
 milieu del'hyuer, & au commencement de ce-  
 ste guerre, la sayson de l'année faisoit craindre  
 la ruine de l'armée sans aucun effect, si lon en-  
 treprenoit d'assieger ses places, ce qui eust a-  
 porté tresgrande de faueur aux affaires du Roy,  
 si aux premiers exploicts l'armee eust esté re-  
 butée, Il n'y auoit aussi en l'armée que qua-  
 tre canons & deux couleuines, car le Sieur Ma-  
 reschal de Matignon, qui pendant que le Duc  
 du Mayne aprochoit, auoit assiegé le chasteau  
 de Ionsac sur les confins de L'angoulmois &  
 Bourdellois, auoit bien faict venir de Bour-  
 deaux par la mer six canons, pour la crainte  
 desquels ceux qui tenoient Ionsac auoient ca-  
 pitulé avec luy, mais il les renuoia a Bour-  
 deaux: dans Saint Iehan & Pons estoient le  
 Prince de Condé, les Sieurs de Laual, ses fre-  
 res, les Sieurs de la trimouille, de Rouhan, &  
 tous ceux qui festoient sauuez de la route du  
 Prince de Condé, & disoit en que quelques  
 mois auparauant, & lors que l'armée auoit e-  
 sté en Broüage, Saint Iehan estoit abandon-  
 né des garnisons, à cause de la peste, qu'estoit  
 dans la ville, & n'y auoit aucuns viures, & mes-  
 mes qu'il auoit esté proposé d'y mener l'ar-

mée, & que sans difficulté lors on l'eust emporté: a present Sainct Iean estoit tresbien pourueu d'hommes & de viures. Les deputez des autres prouinces proposoient, que puis que la raison de la guerre ne vouloit qu'en ceste sayson on ataquast les places de long siege, que celles de leurs prouinces que tenoiēt les huguenots, n'estoient que bicoques, lesquelles l'armée viuant & temporisant durant l'hyuer, reduiroit aysement en l'obeissance du Roy, & deliureroit plus de cent lieuës de pays occupé, & qui ne payoit au Roy aucune taillen'y debuoir: on escriuoit de Bourdeaux que l'armée n'y pourroit viure, par ce que le degast y auoit esté faict tresgrand par les Regimens de Puiferat de Sarliac & autres, & par les forces des huguenots, qui depuis le mois de Mars s'y estoient continuellement esbattues: & si l'armée ou partie d'icelle prenoit le chemin de perigort, il falloit sçauoir ou elle passeroit la riuere de Dordogne, sur laquelle il n'y a autre pont que celui de la ville de Bergerac, ou est l'un des plus celebres asiles des huguenots de France. La riuere de dordogne presque depuis sa source, qui est dans les montaignes d'auerngne & de Limosin, court trente lieües de gasconne, qui valent plus de quatre vingts lieuës de France, par pays qui lors estoit presque tout occupé des huguenots, & n'y auoit en temps de guerre, as-

seur passage pour les seruiteurs du Roy & Catholiques, qu'à Souillac. On disoit que le Viconte de Turenne deliberoit de trauailler L'armée au passage de ceste riuiere. Le Sieur D'hautefort Gouverneur de Limosin qui lors estoit de retour en l'armee, &, le Sieur de l'estang president de briue, furent depeschez a Chasteauneuf par le Duc du Mayne, pour recognoistre les lieux & commoditez du passage de dordogne: on enuoya aussi vng gentilhomme deuers le Sieur de saint Suplice Seneschal de Quercy, pour en auoir son aduis, & dequoy il pourroit ayser l'armée au passage de la riuiere. Les Sieurs D'hautefort &, del'estang a leur retour trouuarent l'armee a villebois, & raportarent que a Limeuil qui est à deux lieuës de la Linde & a quatre lieuës au dessus de Bergerac, le passage y estoit tresbon & le plus proche de l'armée, s'il si pouuoit assembler assez de batteaux pour cest effect. A la Linde tenue par les huguenots, qui est sur la riuiere de Dordogne comme est aussi Bergerac, il y auoit vintg & cinq grands batteaux, que les habitans tenoiët prests, pour se iecter dedans avec leurs meubles & s'ecouler à Bergerac si l'armée venoit à eux: quelques Gêtils hômes mirët enauât des moiës pour surprêdre la Linde, lesquels ne peurët estre effectuez. Le passage de Limeuil ou tout a la fois on passe les riuieres de Dordogne & de Vezere qui se

ioignent au dessus de Limeuil, estoit inutile  
 par ce qu'il n'y auoit moien d'y faire monter  
 n'y descendre des batteaux, les Huguenots te-  
 nāt au dessus & au dessous de la riuere plu-  
 sieurs bonnes places. Il falloit dōcques mener  
 l'armée à Soliac ou a cinq lieuës plus hault  
 vers Beau-lieu, où il y auoit vne forte guar-  
 nison d'Huguenotz comme estant au milieu  
 du Viconté de Turenne, aussi le sieur de saint  
 suplice offroit d'assembler entre Beau-lieu  
 & Souliac cinquāte batteaux, partie desquels  
 les Huguenotz auoyent mis afonts, & partie  
 deliberoit-il de les faire porter sur des charet-  
 tes de la riuere du Lot dans celle de d'Or-  
 doigne. Ce raport entendu, & le Roy, ayant  
 respōdu au Duc du Mayne, que luy & le sieur  
 Mareschal de Matignō, estās sur les lieux, pou-  
 uant iuger à l'œil ce qu'estoit plus importāt  
 pour son seruice, il se remettoit à eux de ce  
 que l'armée deuiendroit, laquelle ayant fait  
 monstre & receu payement, il fut resolu que  
 le sieur Mareschal de Matignon, avec le regi-  
 ment des Suisses, du colonnel redhit, & les re-  
 gimens de Pui ferat, de Sarliac, de Canisy,  
 d'Oraison, & de Pralin, les compagnies de  
 gens d'armes du Côte de Torigny, & du sieur  
 de la Barge, prendroient le chemin de Bour-  
 deaux. Le regiment des Souisses, du Colonel  
 Heild, & les regimens de Sacromoro de Bira-  
 gue, de Vic, du Cluseau, du Fraifne, & de la  
 Roche



Roche Montefon, & les compagnies de gens d'armes du Duc du Mayne, du Viconte de la Guierche, du Marquis de bel, Ylle, la compagnie de cheuaux legiers du Marquis de Vilars, & celle du Capitaine Nicolo albanois, & les quatre Cornettes de Reytres, fuiuoient le Duc du Mayne avec les quatre canons & les deux Coleurines. Lequel print le chemin de Perigueux par la tour blanche & Bordeille. Le Duc & le Mareschal se departans a Villebois, le quatriesme de Ianuier, resolurent de se reioindre deuant sainte Bazille au vingtcinquesme de Feburier. Le neufiesme de Ianuier le Duc arriua à Perigueux, au deuant duquel les consuls de la ville alarent vne grande lieue, & le menarent descendre au deuant la porte de l'Eglise Cathedrale, ou l'Euesque accompagné de son Clergé reuestus de leurs Chappes l'attendoient, qui le receurent avec tres honorables parolles & tesmoignages de la consolation que sa venue en Guienne leur apportoit, & a tous les gens de bien affectionnez à Dieu & au Roy, ce qu'ayant finys marcharent au deuant du Duc, chantas le Te Deum iusques au grand autel. ou le Duc à deux genoux fit son oraison à Dieu, & offrit, ce qui estant fait l'accôpagnarent en son logis. Pendant que l'armée estoit à Chasteauneuf & à Villebois, le Viconte de Turenne sortit deux Coleurines de Monflanquin, & alla assieger

Belues qui est vne petite ville en perigord, laquelle il ne sceust prendre, peu de iours apres il assiegea & forcea la maison du Sieur de Lusiers à deux lieues de Bergerac qui estoit seulement fortifiée de quelques garites & dans laquelle il y auoit quatorze soldats, qui vendirent cherement leurs vies. De la il alla assieger l'Abbaye de saint Ferme pres Monsegur en la seneschaucée de Bazadois, laquelle il força, il entreprit de faire le semblable de la commanderie de Roquebrune, qui est aussi pres de Monsegur, d'où il fust repoussé, tous ses exploits estoient fort peu de chose pour oser faire teste & s'oposer à vn Roy de France, mais ils seruoient de subiect aux fauteurs des huguenots, pour parler en leur faueur, & faire croire qu'ils estoient fors, puis que l'armée du Roy estant en Guienne, ils auoient le cœur de tenir la campagne avec artillerie, & faire des sieges, (de deux iours toutesfois pour le plus & aux plus foibles mettairies). Au partir de Perigueux il falloit que l'armée pour ioindre à la riuere de Dordogne, passant premierement la riuere de Vezere sur le pont de pierre à Terrasson, rencōtrast sur ce chemin la ville & Chasteau de Montignac le Conte, qui est sur la vezere, appartenant au Roy de Nauarre, & ou il auoit mis des gens de guerre pour le defendre. Le Maire & Consuls de Perigueux requeroient qu'on assiegeast Montignac, & le Sieur D'haucfort lieutenant du Roy au Li-



mosin proposoit, que l'armée marchan  
du costé de Montignac, la Maurie aban-  
donneroit la Ville de Tulle, qui est a vne  
grande iournée de Montignac. Pour faire ce  
siege il ne se trouua en l'armée que cent ba-  
les de Canon, à Briue qui est a cinq lieuës de  
Montignac il y auoit deux cens bales & vn  
Canon. Le Duc du Mayne enuoia à Briue  
le President de Lestang, pour faire aprestre  
le Canon qui y estoit, assembler de l'atella-  
ge pour le mener & les deux cens bales, &  
y dresser vn magasin de viures pour l'armée.  
Le Canon & les bales estant prestes à par-  
tir, le Sieur D'hautesfort y fust enuoyé avec  
le Regiment de Cluseau, & vne Cornette  
de Reytres pour accompagner le Canon au  
siege de Montignac. Pour ce siege le Duc  
du Mayne auoit aussi depesché le Sieur de  
sainct Perdoux au dorat en la marche, pour  
faire venir vn Canon & vne Couleurine qui  
y sont, il fist aussi venir vn Canon qui apar-  
tient au Sieur de Pompadour, mais ayant  
sceu que le Sieur Marechal de Matignon,  
auoit faict enleuer douze cens bales à Ca-  
non qui estoient dans le Chasteau D'aube-  
terre, & que le Lieutenant D'angolesme,  
qui quelques mois auparauant auoit receu  
à Paris deux mil escus pour lachapt de trois  
mille bales à Canon, n'auoit eu assez de temps  
pour y pouruoir. Iceluy Duc donna ordre que  
en toute diligence on luy fournit mille bales:  
attédât lesquelles il fust quelques iours deuât

Montignac sans faire batterie. Le Sieur D'haute-  
 fort Lieutenant du Roy en Limosin, se disoit  
 Gouverneur pour le Roy de Navarre du Côte  
 de Perigort, à laquelle charge il pretenoit  
 estre annexée la Capitainerie du Chateau.  
 de Montignac, qui est le chef du Conté de Pe-  
 rigort, & à ceste cause porte le nom de Mon-  
 tignac le Conte. Par ce que Hautefort ne sui-  
 uoit le party du Roy de Navarre, le Baron de  
 Salagnac estoit lors Gouverneur de ce Conté  
 pour le Roy de Navarre. Iceluy Sieur D'han-  
 tefort tant pour auoir commandé à ce conté  
 que pour estre les biens de la maison D'han-  
 tefort en ces quartiers auoit des intelligences  
 dans la ville de Montignac, par le moyen des-  
 quelles, & du Sieur de la Faye qui autrefois a  
 commandé au Chateau de Montignac, on pra-  
 tiqua de surprendre la Ville, à fin d'empescher  
 qu'on ne la bruslast, & que l'armée assiegeant  
 le Chateau en ceste saison d'hyuer, peust lo-  
 ger a couuert, le temps de l'execution de ceste  
 surprinse, auoit esté donnée à la nuit de me-  
 credy, pour laquelle execution on choisit  
 huit cens arquebusiers dans les Regimens  
 des Sieurs Sacromore & de vic, lesquels le Mar-  
 dy, on fist auancer deux lieues au de la de Pe-  
 rigueux, sur le chemin de Montignac, & la  
 nuit ils marcharent pour ceste execution de-  
 quoy le Sieur D'hautefort ayant aduertie le  
 Sieur de la Faye qui menoyent ensemble ceste

entreprinse, il vint au deuant leur dire qu'ils auoient prins la nuit du Mardy venant au Mercredy, pour la nuit du Mercredy qui estoit subsequente, dequoy ceux de l'intelligence qui estoient dans la ville de Montignac n'estoient aduertis, & partât les troupes rebroussarent chemin en la paroisse D'eillac, d'ou elles estoient parties, il auoit pleu toute la nuit, & à D'eillac de Môtignac y a cinq grâdes lieues dudict pais, à ceste occasion l'executiō fust remise iusques à la nuit du Ieudy venât au Vendredy, on trouua quelque resistance aux aduenues de la ville, qui fut renuersée avec peu de perte des nostres, lesquels donnarent par trois diuers lieux: le Sieur D'hautesfort conduisoit l'vne des troupes, Sacromoro de Birague & de Vic mennoient les autres deux. Auant qu'ils partissent de Perigueux, il se presenta quelque difficulté entre ses deux maistres de cap pour le commandement, & qui marcheroit le premier, ce qui fust vuidé en ce, qu'en mesme tēps chacun deux dō neroit dans la ville, dans laquelle ils ne trouuerent autres commoditez que le couuert. A la prise de la ville il s'enferma dans le Chasteau six vingts soldats, du nombre desquels il y auoit plusieurs Gentilshommes, ce chasteau est assis sur vn rochier de toutes pars naturellement esleué. Le Viconte de Turenne qui estoit à Bergerac asseuroit de secourir les assiegez. Les bales estant arriuees au

camp, le lundy troisieme de Feurier, il fut tiré de quatre Canons contre le Chasteau deux cens soixante huit coups, le Canon de Briue & celuy de Pompadour ne seruirent point à ce siege, ceux du dorat feurent contremandez, la nuit suyuante ceux du Chasteau demanderent à parlementer, & le lendemain qui fust le quatriesme de Feurier ils sortirent du Chasteau, sous les conditions accordées, qui furent, que les Gentilshommes sortiroient avec l'espée, les soldats avec le baston blanc, que tous iureroient de viure suiuant les edits du Roy, & de ne porter iamais les armes pour le party du Roy de Nauarre, ou autre contre le seruice de sa Maiesté, & qu'ils seroient conduits en lieu de seureté comme ils feurent. La garde du Chasteau de Montignac fust baillée au Sieur D'hautefort dans lequel on trouua quatre cens charges de bled, deux cens pipes de vin, dixsept quintaux de pouldre à Canon, grande quantité de mesche, & de chairs salées. Le pont de Montignac qui est sur la Vezere est de bois, à ceste cause on fist passer les Canons dans l'eau, les Reystrés & leurs charriots passerent sur le pont de terrasson à deux lieues au dessus de Montignac. Le Duc du Mayne partit le neufiesme de Feurier, de Montignac & alla loger à Salagnac, entre les riuieres de Vezere & de Dordogne, Sur le chemin quel'armée faisoit, il y a trois



fors Chasteaux appartenant à trois Seigneurs huguenots, qui sont les Chasteaux des Barons de Salaignac & de Beynac, & celuy de saint Genies, desquels le Chasteau de Beynac peut attendre le Canon, & est le plus important des trois, pour estre assis sur la riuere de Dordogne. Pendant le seiour que l'armée fist à Perigueux, aucuns gentils hommes Catholiques parens des Sieurs de ses trois Chasteaux, requeroient qu'on les leur baillast en garde, selon la forme que les seneschaux auoient commis la garde des maisons des huguenots, à ceux qui les leur auoient demandées en faueur des huguenots, lesquels par ce moyen asseuroient leurs maisons & faisoient fraude aux edits du Roy, qui veut que les huguenots desobeissans soient depollez de leurs maisons, & leur reuenu iouy par des commissaires sous l'autorité de la iustice. La ville de Perigueux estoit la premiere Cité ayant corps d'officiers du Roy, ou le Duc du Mayne estoit entré depuis qu'il marchoit avec l'armée, ou se estendoit son pouuoir de l'employer. Les officiers du siege Presidial & les Maire & cōsuls de la ville, remōstrarēt au Duc du Mayne l'abus des cōmissions que les seneschaux bailloiet à ceux qu'ils cōmettoiet à la garde des maisons des huguenots, lesquels ils disoient estre des sauuegardes. Le Duc du Mayne ayāt assemblé en conseil l'Euesque

de Perigueux, les Cheualiers du saint Esprit, les Gouverneurs des provinces, les principaux officiers & le Maire de ladicte ville, il fust resolu qu'en chacune seneschaucée il seroit esleu vng personnage Catholique, auquel tous les Chasteaux & maisons des huguenots de la seneschaucée seroient baillées pour les tenir en seure garde avec nōbre de soldats, qui seroient departis dans lesdits Chasteaux qui meriteroient d'auoir garde, la soldé desquels se prendroit sur le reuēnu des huguenots, & lesquels soldats donneroient main forte aux officiers de la iustice, pour vendre les meubles desdits huguenots, donner à ferme leurs reuenus, & executer les edits du roy Ceste resolution ne fust point suiue, & dressa lon vn formulaire de la commission que par apres on a dōné à ceux qui sont voulu se charger des Chasteaux des huguenots. Les clauses estoient de donner main forte & accōpagner les officiers de la iustice, pour transporter & faire vedre les meubles, & affermer le reuēnu des immeubles, & ne permettre aux propriétaires d'entrer és maisons n'y en tirer aucune cōmodité Aucuns qui pendant que le Duc du Mayne fut à Perigueux, l'auoient instamment requis de leur commettre les Chasteaux de Beynac & de Salaznac, ayant veu la premiere resolution adoucie & temperée, ne s'en estoient point chargez, toutesfois voyant que



l'armée alloit loger à Salaignac, ils en prindrēt commission. Le Duc du Mayne logea au pavillon qui est au iardin du Chasteau, dans ce Chasteau estoit la Mere du Seigneur qui est huguenote, & ses enfans estoient à Bergerac. Les habitans de la ville de Sarlat, requeroient le Duc du Mayne d'assieger le chasteau de Montfort qui apartient au viconte de Turenne, & est à vne lieuë deux sur la riuere de Dordogne, le Sieur de Sessac cheualier du S. Esprit le fust recognoistre, lequel ayant raporté qu'il estoit assis en si forte assiette, que difficilement pouuoit on planter le Canon pour le battre, que les Vilages des enuirois ayans esté bruslez pour crainte de ce siege, il seroit impossible aux soldats à cause de l'hyuer d'y faire garde à descouvert, & que ce Chasteau estant prins les batteaux n'y pouuoient estre conduits, pour le passage de l'armée à raison des fors que les huguenots tenoient au de la, sur la riuere, & d'autre part on auoit nouuelles du Sieur Mareschal de Matignon, qu'il parloit de Bourdeaux avec les Canons & l'armée pour assieger Casterz, & de la se rédre à sainte Bazille au vingtcinquiesme de Feurier, partāt il fust resolu qu'on partiroit, pour (passāt par Gigniac & Martel) se rendre à la ville de Beaulieu, la forcer & y passer la Dordogne. Les Sieurs de saint Supplice, de Clermond de

L'odeuc, & de Camburat promettoient de assembler à Beaulieu nombre de batteaux pour le passage de l'armée, laquelle ils tiroient de ce costé en esperance d'obtenir qu'elle marchast iusques à la ville de Figeac, que les huguenots tiennent & qui n'est qu'à hui&lt; lieuës de Beaulieu. L'armée estant arri- uée à Martel, sur les diuers rapports qu'on faisoit des difficultez des passages de l'artil- lerie, sur le chemin de Beaulieu, le Duc du Mayne l'ayant luy mesme recongneu si dif- ficile, qu'il estoit impossible voyre au cœur de l'Esté d'y passer, il fallust chercher autre passage de la riuiera, qui fust recongneu au lieu de Creysse à vne lieüe de Martel, Lors que le Duc arriua à Martel, le Regiment de Sacromoro fust logé sur la main gauche à vne lieue de Turenne, La Maurie qnï des- puis la prinse de Tulle y auoit demeuré gou- uerneur, se doubtant qu'on yroit à luy, auoit par la volonté du Roy de Nauarre, tenu praticque avec les habitans de la ville pour la quitter, & en sortir les soldats qu'il y auoit, & scachant que l'armée entroit dans le Viconté de Turenne, apres auoir receu douze mille escus des habitans de Tulle pour ce- ste derniere composition, pillé & empor- té tout ce qu'ils peurent, il en partit avec ses soldats, & sen alla en la ville de Turenne,

d'où les deux premiers iours que le regiment de Sacromoro, fut logé pres d'eux, ils le vindrent recognoistre de si pres, que le second iour la Maurie y fut tué d'une mousquetade dans la teste. Le Sieur de Cornusson Seneschal de Tholoze, & des Capitoulz deputez de la ville de Tholoze, vindrent à Martel saluer le Duc, & le requerir d'aprocher d'eux l'armée, pour ataqner le mas de Verdun, & Monrauban, offrant grande quantité de munitions de viures pour la nourriture de l'armée, neuf canons qu'ils auoient prests, poudres & bales pour tirer deux mille coups, & deux mil hommes de pied soudoyes, à quoy le Duc respondit, qu'il estoit prest de les assister selon qu'ils desiroient, de quoy il escriroit au Roy, pendant qu'il yroit reprendre partie de son armée qui estoit avec ledict Marechal, & que si sa majesté commandoit de prendre Le chemin de Tholoze, que bien tost il seroit à eux, Alors arriuerent aussi les compagnies de gens d'armes de Héry Monsieur filz aîné du dict Sieur Duc, & celle du Sieur de Teuale Le Duc du Maine, seiourna treize iours en la ville de Martel, attendant que l'armée eust passé la Dordoigne, le retardement prouenoit du default de batteaux, car il n'en fut assemblé que sept grandz ou petits au Port de Cressé, & sur les deux plus grands

Joinctz ensemble, il fut fait vn ponteau, qui  
 tenoit par vne polie à vn cable, mis au tra-  
 uers de la riuere, sur ce ponteau, feurent pas-  
 sez trois Canons, deux Coulourines, & les  
 Chariotz, des Reystrs: Mais pendant qu'on  
 dressoit ce ponteau, on passoit avec grande  
 diligence dans les petits Batteaux, les pou-  
 dres & autres munitions, lesquelles il auoit  
 falu descharger des Chariotz. La diligence  
 y fut tresgrande pour la presence du Duc du  
 Mayné, lequel tout au long du iour demeu-  
 roit à Creisse sur le bord de la riuere, pour  
 hastier le passage, & luy mesme & la Noblesse  
 y mettoient la main, & encores pour auâcer le  
 passage de l'armée, deux Canons, avec quel-  
 ques regimens de gens de pied, feurent bail-  
 lez au Sieur de saint Chaméran, Mareschal,  
 de l'armée, pour les faire passer au port de  
 Souliac, & battre le chasteau de Rocq, qui  
 estoit au dela la riuere, dans lequel il y auoit  
 trente soldatz Huguenotz, qui ruynoient  
 grandement le plat pays, & d'ordinaire deua-  
 lisoient les courriers, qui venans de la court,  
 tenoient le chemin de la poste par Limoges,  
 Briue & Souliac, pour se rendre à Tholose &  
 en Languedoc. Ses huguenots du Rocq, enten-  
 dant que le Canon passoit à Souliac, de nuict  
 l'abandonnarent & se retirarent à Bourroles  
 & à Montfort. Depuis que la Maurie auoit es-  
 té tué, les troupes qui estoient à Turenne



se contenoient, Cauagnac de Quercy qui commandoit, à Beau-lieu, de par le Viconte de Turenne, traictoit de rendre la Ville de Beau-lieu, par l'intercession des Sieurs de Noailles & de Drugnac, & ce de crainte qu'il auoit que le Sieur du Pecher son ennemy, bruslast ou ruinaist son Chasteau de Cauagnac, lequel il auoit surprins, lors que l'armée entra en Limosin. Le Sieur, d'Hauthefort Gouverneur de Limosin, desconurant le dessaing de Cauagnac, qui estoit d'entretenir le Duc du Mayne, sur ceste praticque de la redition de Beau lieu, sçachant bien que l'armée ayant passé la riuère, il n'y auoit plus d'aparâce qu'elle reuint à luy, obtint du Duc les deux canôs qui estoient passez à Creysse, des bales & munitions pour tirer cent coups, & quelques compagnies de gés de pied, pour aller attaquer la ville de Beau-lieu, qui est sur le bord de la riuere de Dordogne, & pour ceste execution le regiment de Sacromorode Birague marcha du costé de Beau-lieu, iusques à Astaliac, qui est à demye lieuë de Beau-lieu. Sur le chemin canon, on rencontra le Village de Gaignac, qui est du Viconté de Turenne, & dans lequel il y auoit tousiours eu garnison, d'Huguenotz & combien qu'il n'y eust autre forteresse, que des maisons ioinctes ensemble, toutes fois ils ne se voulurent point rendre, & y fut tiré soixante coups de canon, encores se presanrarët



ils a la breche, ou le Sieur de la Roche, Montefon, Maistre de Camp de l'un des regimens, fut blessé d'une arquebusade au Visage, lequel estant forcé par les nostres, ceux qui furent prins des ennemis feurent pendus, le bruiet qui courut de ceste execution, à laquelle on ne pensoit aucunement, fut cause que le Chasteau de Comiac, appartenant au Sieur de saint Supplice, distant vne grande lieue de Gascongne de Gaignac, fut abandonné des Huguenotz qui le tenoient, la garnison de ce Chasteau de Comiac estoit renommée, de ce que durant les dernieres paix elle auoit tousiours continué de voler, piller, saccager & rançonner, ce qu'ils appelloient faire la guerre: ou il y auoit deux cens hommes d'ordinaire, & brief tous ceux de ce pais la qui pendant la paix vouloient piller, se retiroient à Comiac, le succès de Gaignac fut aussi cause, que ceux de la ville d'Argentat, qui sont du Viconté de Turenne, & des plus antiens Luteriens de ce Royaume, & sur la riuere de Dordogne à trois lieues au dessus de Beau-lieu, accordarent de demolir trois forts qu'ils auoient faicts dās leur ville, lesquels acheptarent par autres moyens la paix d'aucuns Sieurs leurs voisins, les deux canons au partir de Gaignac, feurent ambarques sur des Batteaux que le Sieur de Clermond Delodeue qui à plusieurs beaux & forts Chasteaux és enuirōs de Beau-lieu, & de saint Cere, fit tirer de l'eau

ou les huguenotz les auoiét enfonceez. Le regiment de Sacromoro, estoit logé au dela la Dordogne, iusques dans les Faulxbourgs de Beau-lieu, toutesfois Cauagnac faisoit mine de tenir bon estant bien informé, que l'armée continuoit de passer la Dordogne à Croysse & à souliac, en deliberation de ne venir point à luy, que le Sieur d'Hautefort auoit commandement de ne mettre point le canon en terre du costé de Beau-lieu, pour n'estre cause de faire seiourner plus longuement l'armée ou elle estoit, & aussi qu'il n'auoit peu obtenir des munitions de pouldres & des bales, & qu'il auoit commandement du Duc de composer en quelque sorte que ce feust, pourueu que la ville de Beau-lieu feust en l'obeissance du Roy, & encores pour amuser avec plus de couleur le Sieur d'Hautefort, iusques à ce que l'armée auroit passé la riuere, il traictoit avec luy de la reddition de la ville, & en vindrent si auant, que le frere du Sieur du Pecher, partit pour entrer dans le Chasteau de Turénne hôte du traicté qu'on capituloit avec Cauagnac, & ceux qui estoient dans Beau-lieu: mais en chemin estant aduertý qu'on luy vouloit faire vn mauvais tour, il s'aresta & en aduertit le Sieur d'Autefort son oncle. Le Duc du Mayne ayât fait passer a Creysse, les Reitres les canons, les munitions des pouldres & des viures, & leurs atelages, y restant seulement

à passer les Suiffes, alla loger en la ville de Souliac, à fin qu'en mesme temps toute l'armée eust passé la riuere, à sçauoir luy & ceux de sa cornette à Souillac, les Squiffes, à Creisse, & le regimēt de Sacromoro à Beau lieu, d'heure, à autre il enuoioit deners le Sieur d'Haute-  
fort, pour sçauoir ce qu'on faisoit à Beau lieu, & s'y la ville estoit renduë, mais ayant seiourné deux iours à Souliac, entendant qu'on n'auoit encōres rien auancé du traicté de la reddition de Beaulieu, il monta promptement à cheual avec quelque troupe de caualerie, & passant par Martel, alla loger à Astaliac, ou estoit le regiment de Sacromoro, ou aussi le Sieur d'Haute-  
fort qui estoit logé au dela la riuere, le viut trouuer, acompagné du Sieur de Lineyrac, & de beaucoup de Noblesse de Auvergne qui venoient trouuer le Duc du Mayne, Cauaignac ayant capitulé avec le Duc, qu'il rendroit les enseignes, & que luy & ses soldats seroient conduicts en lieu de seureté, il remit la ville de Beau lieu entre les mains du Sieur d'haultefort, le Duc du Mayne partant d'Astaliac retourna à Souliac, ou il auoit laissé le Sieur de Sessac, ordonnant au Sieur de Sacromoro de passer la riuere à Beau lieu, & s'acheminer avec les deux canons en la ville de Gourdon, en Quercy, ou il rassembla toute l'armée, qui auoit esté quelques iours séparée, Le Duc du Mayne, venant à  
Souliac,

Souliac, rencontra les Sieurs de Bournazel & de Cornillan, lesquels le vindrent saluer de la part du Rouergue, le suppliant d'y mener l'armée, offrant pour l'entretenement d'icelle grande quantité de munitions de viures & de pouldres, & cinquante mille liures. Au dela la riuere de Dordogne, un peu au dessus du port de Creysse, il y a vn Chasteau du Viconte de Turenne qu'on nomme Montualen asses fort contre deux canons, le premier iour que le Duc du Mayne fut au port de Creysse, il enuoya le Capitaine de sa garde sçauoir qui commandoit à ce Chasteau, celuy qui en auoit la garde de par le Viconte de Turenne, qui estoit natif de Flandres, sortit librement, & vint à Creysse parler au Duc, lequel apres quelques propos, luy commanda d'y receuoir le Capitaine de sa garde & quelques soldatz, ce que le Flaman refusant de faire, le Duc commanda qu'on le pandist au premier arbre, puis qu'il estoit si outrecuidé de refuser d'obeyr au Roy, a la barbe d'une telle armée, en fin le Flaman obeit: Il fut mis dans ce Chasteau, vn Capitaine avec trente & cinq soldatz, la soulde desquels fut departie sur aucunes parroisses du Viconté de Turenne, qui pour estre de ce Viconté sont exéptes de payer tailles n'y aucuns subsides au Roy. Attendât que l'armée soit rassemblée à Gourdo, pour nous donner subiect de continuer le fil de son progres, nous dirons ce que nous



auons aprins se iournant à Martel des priuile-  
 ges de ce Viconté, qui sont de ne payer aucu-  
 nes tailles ny subside au Roy, le Viconté s'e-  
 stand dans le Perigord, le Querey le hault Au-  
 uergne. E principalement dans le pays de Li-  
 mosin, où est assis le Chasteau de Turenne, à  
 deux lieues de la ville de Briue. Il y a eu des Pa-  
 pes de ceste maison de Turenne, & tiét le cō-  
 mun qu'ils aquirent les priuileges dont ceste  
 Viconté iouyt, ce qui est faux. La verité de l'i-  
 stoire est, qu'au temps que les Papes seoiét en  
 Auignon, en l'année mil trois cens quarante  
 deux Clement sixiesme du nom, fut esleu Pa-  
 pe, lequel auoit nom Pierre de Monstrie, na-  
 tif d'un village du bas pays de Limosin, de la  
 terre du Baron de Maulmond, Ce pierre fut  
 moyne de l'Abbaye de la chaise Dieu en Au-  
 uergne, fut Docteur en Theologie, & en fin  
 Abbé de la Chaise Dieu, puis il fut Archeue-  
 que d'Arles, Archeuesque de Sens, Archeues-  
 que de Rouan, Cardinal, & dix ans Pape, le frere  
 de ce Pape Clemét sixiesme, fut marié à vne  
 fille de la maison de Turenne, par le moyé de  
 laquelle il fut Seigneur de Turéne, & la verité  
 est qu'il espousa ceste fille de Turenne, auant  
 que Clement son frere feust promu à la pa-  
 pauté, car Clemét fit Cardinal son nepueu filz  
 d'une fille de Turenne, aagé seulement de dix  
 & sept ans, lequel il mit soubz la charge de  
 Balde, Docteur és Droietz pour l'instruire, il

faloit doncques q̄ ce Cardinal fust né auant la promotion de Clement au papat, car Clemēt ne tint le siege que dix ans, le Roy Philippes de Valois en faueur de Clement, dōna au frere du Pape la Seigneurie de Beaufort en Valée, qu'il erigea en Conté, & lors ceux de Turenne, prindrent le nom de Beau-fort & s'intituloient Cōtes de Beau-fort & Vicontes de Turenne, & ce Cardinal nepueu de Clement s'appella le Cardinal de Beau-fort, Apres Clement, il y eut deux Papes qui regnerent dix-huict ans, qu'on dict estre aussi natifs de Limosin, ausquels succeda ce Cardinal nepueu de Clemēt, qui print le nom de Gregoire vnziēsmē, personnage tref-dōcte & de sainte vie, lequel ramena d'Auignō le siege de la Papauté à Romme, s'il est vray que ses quatre Papes fussent Limosins, les Limosins tindrēt trente & cinq ans la Papauté, & encores tascherent ils d'y seoir, & regner pluslonguemēt, ainsi que dict l'histoire. Les tiltres que le Viconte de Turenne a de ses priuileges, ne portent point qu'ils ayent esté acquis par ses Papes, n'y par autres, mais bien que ayant esté octroies par vn Duc de Guienne, noz Rois les ont confirmés & le plus ancien tiltre de confirmatiō qu'ils en ont, est datte de Ville-neufue, L'ez Auignon, accordé au nepueu du Pape en faueur de son Oncle, cesterace des Contes de Beau-fort & Vicontes de Turēne,

dura iusques en l'an mil quatre cens , auquel temps leurs biens furent saisis par la iustice, & iouys par commissaires, par ce qu'ils tenoiēt le party de Langlois contre le Roy ceste saisie tint sept ans, sans que le Viconte en peut obtenir main leuée, pēdant laquelle saisie il mourut, l'aisant vne fille, laquelle le Roy voulut qu'espousast messire Iean le Maingre, ieune Gentilhomme & lors Seneschal de Limosin, qu'on nommoit Bouciquault, & depuis fut Marechal de Fraāce, & en faueur de ce mariage, le Roy leua la saisie des biens de la maison de Turenne, à ceste occasion Messire Iean le Maingre, dict Bouciquault, fut Conte de beau-fort, & Viconte de Turenne, de ce mariage il n'y eut point d'enfans, par apres les puiffinez de la maison de la Tour d'Auuergne sont entrez gendres en la maison de Turenne. Le Duc du Mayne estant à Gourdon, receut lettres du Sieur Marechal de Matignon, qu'il s'estoit rendu a Castetz avec les forces qu'il auoit, accompagnées d'onze canons & de deux coulourines, & que le Roy de Nauarre, estoit à Nerac, assemblant des forces pour l'empescher d'assieger castetz, que s'il se hastoit d'aprocher l'armée de la Guaronne, il se presanteroit occasion de le combattre, chasque iour il arriuoit au Duc des gens dudiēt Sieur Marechal, qui continuoient ses nouvelles, & le sollicitoyent d'apro-



cher de la guaronne, qui fust cause que le Duc ne peust comme il desiroit, assister le Sieur de S. Supplice & les deputez de Quercy, qui le requeroient d'aller assieger la ville de Figeac, qui est à huit lieux de gourdon, sur le derriere du chemin que l'armée faisoit, & pour ceste expedition, ils offroient nourrir l'armée ayant pour c'est effect mis en maugasin quantité de viures, & en outre offroient de donner la somme de douze mil escus, pour ayder à soudoyer les gens de guerre. Iusques alors l'hyuer auoit esté fort doux, mais enuiron le dixiesme du mois de Mars, le froid, la neige & gelée, s'esleuarent qui dureront six semaines, & eust esté du tout impossible durant tel temps d'assieger Figeac n'y autre place, neantmoins combatant l'iniure du temps, l'armée marcha à Saluiac, à ville Franche de perigord, & à Libos sur la riuere de Lot pres de Fumeil. Ceste iournée de Libos fust des plus signalées de tout ce voyage, pour la pluye froide qui continua tout le iour, les neiges qui fondoient, le pays gras & marécageux ou lon marchoit, & pour les mauuais logis dudict Libos, qui sont bastis de terre, & où il n'y auoit porte, ny fenestre, n'y degré pour monter. Ceste iournée fist beaucoup de malades, perdit plusieurs bons cheuaux ruyna l'armée, & mesmes les cheuaux de l'artillerie & des munitions, aucuns des Canons & presque toutes



les munitions, demeurèrent en diuers lieux en plaine campagne à plus de deux lieues de Libos, il ne se trouuoit aucun fourrage n'y herbe ou bled nouueau, pour nourrir les cheuaux. Depuis le partement de Martel on n'auoit peu recouurer d'auoine, des cheuaux des atellages des Canons, & des munitions des poudres, dont il y en auoit mille de payez sur l'estat du Roy, plusieurs moururent du travail de ceste iournee, & du mauuais traitement des precedentes, la maladie du sieur de Selincourt qui commandoit à l'artillerie, causée de l'arquebusade qu'il auoit receu au genouil au siege de Montignac, faisoit comme on disoit qu'il y auoit plusieurs desordres en sa charge. Sur ce chemin de Gourdon à Libos, le Duc auoit eu nouuelles du sieur Marechal de Matignon, que le Roy de Nauarre estoit sorty de Castelialoux, qui est a quatre lieues de Castets, avec trois mil hommes de pied & cinq cens cheuaux, qu'estoit ce qui le faisoit haster & combattre ce mauuais temps, apres il escriuit que n'ayant point de Cuallerie, que les compagnies de gens d'armes du Conte de Torigny son Fils, & du sieur de la Barge, il auoit retiré l'armee de deuant Castets, es enuiros de Langô, apres que Puyferrat maistre de camp de huit enseignes de gens de pied, recognoissant Castets y eust esté tué d'une arquebuzade. Estant arriué à Libos,

le Duc eut aduis que le Viconte de Turenne avec quelque troupe de gens de guerre, aiant passé la Guaronne s'estoit ioinct au Roy de Nauarre, & que leur desseing estoit d'aller ensemble à Montauban, par Leytoure & le Mas de Verdun, ou à Bergerac, par sainte Bazille & Monsegur. Sur quoy le Duc du Mayne se resolut promptement, de partir de Libos, & aller par Villeneuve d'Agenois au port sainte Marie, qui est à deux lieues de Nerac, la riuere de Guaronne entre deux, où le Roy de Nauarre & le Viconte de Turenne estoient, & d'où le Duc pouuoit prendre le chemin en haut où en bas au long de la riuere de Guaronne, selon qu'il entendroit que le Roy de Nauarre marcheroit, pour le rencontrer au passage de la riuere. Il laissa à Libos le sieur de Monberad Mareschal de camp, pour rassembler l'armée; les Canons & les poudres, qui à cause du mauuais temps & de la ruine des atellages, estoient demeurez sur le derriere. Et partit auant le iour avec la cauallerie, pour arriuer comme il fist à Villeneuve d'Agenois enuiron le Midy, où il auoit enuoie deuant le sieur de saint Chameran, pour apprendre des nouuelles du Roy de Nauarre, & plusieurs Gentilshommes auoient aussi esté enuoiez en diuers lieux, voire bié pres de Nerac, pour ce mesme effect, qui rapportarent, que le Roy de Nauarre partât de

Nerac, auoit prins le chemin de Pau, & que le Viconte de Turenne auoit prins le chemin de Leytoure sur ces aduis qui estoient veritables, on s'arresta à Villeneuve, attendant l'armée qui estoit demeurée derriere, deux iours apres il vint nouuelles que le Roy de Nauarre estoit de retour à Nerac, accompagné de six vingts bons cheuaux, pour aller ou à Montauban où à Bergerac, soudain le Duc du Mayne partit de Villeneuve, suiuy d'une tresbelle & grande compagnie de Noblesse, bien montée & bien armée, qui marchoit sous sa Cornette, suiui de sa compagnie de gens d'armes, & de quelques autres, pour se rendre au port, de sainte Marie, qui est à cinq grandes lieues de Gascongne de Villeneuve, il fit aussi marcher mille arquebusiers tirez des Regimens de Sacromoro, de Vic, & du Fraisme, que pour ce mesme dessein des qu'il estoit party de Libos, il auoit fait auancer sur le chemin de Villeneuve au port. Oncques on ne vit Prince aucc tant d'alegresse & de bonne grace, pour bien animer sa troupe, & n'y eut nul à qui il ne parlast, & l'entretint sur le seruice qu'ilz esperoient de faire au Roy, si Dieu les vouloit tant favoriser, qu'ils rencontraissent ceste troupe, mais aprochant d'une lieue du port, il fust bien autant marry, entendant que le Roy de Nauarre, sans seiourner que deux heures à Nerac en estoit party, & qu'ayant desia passé la



riuere de Guaronne à sainte Bazille, il estoit  
 arriué à Monsegur, pour se retirer à Bergerac.  
 Soudain que le Duc fust arriué au port de sain  
 cte Marie, il alla recognoistre les batteaux qui  
 y estoient, & commanda qu'on les fist descen-  
 dre à Esguilon, & ayant seiourné deux heures  
 au port, il monta à cheual, & la nuit s'en alla  
 à Esguilon, pour sur les batteaux qui descen-  
 droient, faire en diligence passer la riuere de  
 Lot, qui entre à Esguilon dans la Guaronne, à  
 quelque nombre de gens de cheual qu'il bail-  
 la au Sieur de Sessac, pour battre l'estrade ius-  
 ques à sainte Bazille & à Monsegur, & cer-  
 cher de rencontrer ceste troupe du Roy de  
 Nauarre. Lors que le Duc partit du port, il  
 commanda au Sieur de Montluc de passer la  
 Guaronne, & battre pareillement l'estrade  
 entre Nerac Castelialoux & Caulmont, qui  
 sont toutes places tenues par les ennemis, &  
 sur le chemin que le Roy de Nauarre faisoit  
 & tascher d'apprendre des nouuelles du pas-  
 sage du Roy de Nauarre, & le venir retrouver  
 à Esguilon. ou ayant entendu que pour le cer-  
 tain le Roy de Nauarre auoit passé, & qu'il e-  
 stoit dans Bergerac, le lendemain le Duc s'en  
 retourna à Villeneuve. Le Sieur de Sessac ren-  
 cōtra entre Tonceims & Cleirac quatre vingts  
 arquebusiers huguenots, qui furent deffaits,  
 desquels il en demeura cinquante de mors sur  
 la place, les autres feurent prisonniers ou se



niarent voulant passer la Guaronne à nage, à ceste charge le fils aîné du sieur de Tianges Lieutenant de la compagnie de gens d'armes du Duc du Mayne, y fust blessé, de laquelle blessure peu de iours apres il mourust l'armée estât rassemblée à Villeneufue, quelques iours auant qu'elle en partit, le Guydon de la compagnie de gés d'armes du Viconte de la guierche, obtint avec importunité du Duc du Mayne, d'aller à la guerre du costé de Monflanquin, ou le sieur de Bèthune auoit pour le Roy de Nauarre vne tresbonne garnison, & forte de Cauallerie, & combien que le Duc du Mayne l'eust aduertiy de faire sa partie auantageuse, & se bien accompagner, neantmoins il luy aduint, que rencontrant trente cheuaux pres Monflanquin, il les renuersa, mais pensant qu'ils n'eussent point de suite, il trouua que c'estoient seulement les couteurs du gros des ennemis qui estoient à leur queue, les nostres se defendirent si vaillamment, qu'ils tuarent plusieurs des ennemis, mais en fin leur grand nombre les forcea, & de regret qu'eurent les ennemis de la perte qu'ils auoient faicte à ce rencontre, ils tuarent de sang froid le Guidon du Viconte de la Guierche & neuf de ses gens d'armes, qu'ils auoient prisonniers. L'armée partant de Villeneufue d'agenois tint le chemin de Moncla, pour se rendre à

Toneins, & marchoit alors vn peu serrée, parce qu'elle passoit à vn quart de lieue de la ville de Cleirac, la garnison de laquelle, estoit de cinq cens arquebusiers. Le sieur Marechal de Maignon manda lors que à la faueur de l'ap-prochement del'armée, il delogeoit de Laignon pour retourner au siege de Castets, ou ayant tiré quatre cens coups de Canon il fa-lust changer la batterie & faire vn caualier, il y auoit dans Castets quatre cens arquebusiers, Fabas qui en est Seigneur estoit à Castel ia-loux, lequel vint à Caumont pour faire trai-cter avec le Duc de la reddition de Castets, Le Duc estoit arriué à Marmande à vne lieue de sainte Bazille, desirant de sçauoir l'estat de l'armée du sieur Marechal, & du siege de Castets, & de conferer avec luy. A ces fins les sieurs de Pont carré & de Gourgues vindrent à Marmande, de la part du sieur Marechal, proposant que le Duc assiegeast sainte Ba-zille en mesme temps qu'on battroit Castets, le Duc auoit cinq Canons & deux Coulouri-nes, qui n'estoit assez pour assieger sainte Ba-zille, ou il y auoit mil hommes de guerre, Des vnze Canons & deux Coulourines que le sieur Marechal auoit, aucuns estoient de-montez & les autres estoient necessaires pour la batterie de Castets, le Duc craignant que attaquant en mesme temps Castets & sain-te Bazille, on fust contrainct de leuer

le siege del'vn des deux, pour assister à l'autre, à fin d'en auoir plus particulièrement l'aduis du Sieur Marechal, avec les Sieurs de Pontcarre de gourgues il euenia deuers luy Monsieur forget, qui par commission du Roy faict pres du Duc les charges de secretaire des affaires d'estat & de surintendant des Finances en l'armée de Guienne, on tenoit pour certain que Castetz ne pouuoit estre force, si l'armée du Duc du Mayne n'y alloit, & d'autre part il y auoit de ce costé tresgrande necessité de viures: car l'armée du Sieur Marechal y auoit passé l'hyuer, & consommé toutes sortes de viures, & alloient cinq grands lieues au fourrage. Les bledz ordonnez au magasin de marmade pour le siege de sainte Bazille, n'y auoient point esté assemblez, & de ceux qu'à deniers contens on y pouuoit mettre, l'armée outre passant sainte Bazille pour aller à Castets, n'en pouuoit estre secourue par ce que de tous costez de la riuere il y auoit de fortes places tenues par les rebelles. Fabas pressoit le traicté de la redidition de Castets, à quoy le Duc prestoit volontiers l'oreille, tant pour ne perdre le temps que pour rachepter l'armée de ruynne tres certaine si elle descendoit iusques à Castets, toutes fois il ne voulust rien resoudre sans auoir premierement l'aduis du Sieur Marechal, sur ce que le Duc auoit donné charge au Sieur Forget de luy

communiquer des demandes de Fabas, qui estoient qu'on accepteroit pour la somme de trente mille escus Castets & les biens qu'il a, lesquels il faisoit de mille escus de reuenu le Sieur Marechal ayant respondu au Duc par lettre escripte de sa main, qu'il le prioit bien humblement d'embrasser ceste occasion, & qu'il n'y auoit en cela rien si cher que le temps, il fust conclu que Castets seroit rase, que Fabas promettoit de ne porter les armes pour les huguenots, n'y contre le seruice du Roy de quatre mois, lequel donnoit esperance de quitter ce party, & de venir seruiteur du Roy, & partant luy furent promis douze mil escus qu'on luy deuoit payer dans quatre mois, luy laissant la iouissance de ses biens, & luy promettant d'interceder enuers le Roy pour luy accorder abolition du passé. Sur ce traicté le Sieur Marechal print grand subiect de mescontentement, & principalement de ce qu'il auoit esté fait sans luy (comme il disoit) combien que le Duc eut receu la susdicte lettre plustost que de rien accorder, & que chascune fois qu'il auoit nouuelles de Fabas, il depeschoit vers le Sieur Marechal pour les luy faire entendre, & mesme le Sieur de la Barge en fit plusieurs voyages, estans a quatre lieues l'un de l'autre. Mais le fons du mescontentement procedoit bien d'autre cause, & de la capture faicte par le Sieur Marechal du Sieur de Birac, qui a



uoit esté condamné par la Cour de parlement  
 de Bourdeaux & executé, contre la Sauuegar-  
 de que le Duc luy auoit baillée à l'instance du  
 Sieur de Luffan Gouverneur de Blaye, du con-  
 sentement toutesfois & en presence du Sieur  
 Marechal lors que le Duc & luy se despartir-  
 rent à Villebois. Le sieur Forget aiant com-  
 muniqué avec Monsieur le Marechal estoit  
 allé à Bordeaux, tant pour saluer la Cour de  
 parlement de la part du Duc, que pour leur  
 faire entendre le besoing qu'auoit vne telle  
 armée, que le Roy enuoioit pour la liberté  
 de la Guienne, d'estre secourue & assistée  
 de leur autorité & de leurs moiens, & aussi  
 pour trouuer de l'argent à rendre à Paris. Car  
 il conuenoit que l'armée fist monstre plustost  
 qu'on peust mettre aucun siege, n'ayant esté  
 fait monstre depuis le mois de Nouembre  
 qu'une, que fust faicte à Villebois au commen-  
 cement de Ianuier. Ce mescontentement fust  
 adouci par l'industrie du sieur Forget qui à  
 ces fins fit quelques voiajes vers le sieur Ma-  
 reschal, & pour vn caier de capitulation il en  
 fust fait deux, l'un desquels contenoit ce qui  
 touchoit particulièrement Fabas, comme  
 nous auons dict cy dessus, l'autre caier de ca-  
 pitulation faicte avec ceux qui estoient dans  
 Castets, portoit que la place seroit presente-  
 ment remise entre les mains de messeigneurs

du Mayne & de Matignon, pour estre rasée & en disposer ainsi qu'ils iugeroient plus à propos pour le service du Roy, que le gouverneur, Capitaines, & soldats, sertiroient avec leurs armes, Cheuaux & equipage, ensemble tous autres, & seroient conduictz en lieu de seureté ou bon leur sembleroit, hors mis à sainte Bazille, que sortant de ladicte place, ils mettroient les Enseignes entre les mains de l'Herault de sa majesté, & marcheroient la mesche estainte, demeureroient en ladicte place toutes les munitions de guerre, tant pieces d'Artilleries qu'autres, pouldres & bales, sans qu'ils en peussent rien emporter, que le Sieur de Segatas frere du Gouverneur de Castetz, ou autre pour luy agreable ausdicts Sieurs, se remetroit pour estre hostage entre les mains desdicts Sieurs du Mayne, & de Matignon, iusques à ce que la place, seroit remise entre leurs mains, le Sieur de Montreuil, entreroit dans le Chasteau, avec douze soldatz, pour y demeurer deuant huiet iours, pendant lesquels ils pourroient tirer les viures & meubles qui estoient dans ladicte place de Castetz, & en faire leur proffit, sans qu'il les peussent mener à sainte Bazille, tous les prisonniers de guerre qui estoient dans ladicte place de Castetz seroyent mis en liberté: pendant qu'on trauailloit d'ac-

commodier les fufdicts mecontentemens,  
 le Duc partit de Marmande, & aiant fait alte  
 avec la caualerie au deuant de faincte Bazille,  
 pour donner loifir à l'armée de paffer feure-  
 ment, il alla loger à la Mothe Mongaufcy,  
 ou l'armée fit la feſte de Paſques. Les ſoldatz  
 François auoient beaucoup paty en l'hiuer,  
 que l'armée auoit continuellement marché,  
 & auſſi pour la grande cherté des viures, qui  
 de la memoire des hommes n'a eſté telle en ce  
 Royaume que la preſente année, car la char-  
 ge du bled en aucunes prouinces ou l'armée  
 à paſſé, s'eſt vandue treize eſcus ſol, qui eſt  
 cent dix & ſept eſcns le muy de Paris, & ne  
 trouuoit le ſoldat autre commodité pour le  
 mieux en ſon logis que le couuert, par ce  
 que chacun retiroit ſa perſonne, ſes moyens,  
 & ſes meubles és lieux fors. Pour donner  
 moyen aux ſoldats d'auoir leurs neceſſitez, à  
 fin de les arreſter aux tranchees durant les ſie-  
 ges des plaſſes, il fut aduiſé qu'ils feroient  
 monſtre, & qu'on leur payeroit la ſolde de  
 deux moys: Il y auoit long temps qu'on attē-  
 doit le troiſieſme moys du payement de l'ar-  
 mée, qu'on diſoit eſtre party de Paris, mais  
 n'ayant point nouuelles qu'il approchaſt, le  
 Sieur Secretaire Forget au ſecōd voyage qu'il  
 fit à Bourdeaux, y trouua ſur ſon credit cin-  
 quante mil eſcus contans, à randre à Paris ſans  
 paier aucun change, qui fut tresgrand ſecours  
 à l'armé, car ſans cela elle euſt eſté inutile La  
 monſtre

monstre estant faicte le Mercredy dixiesme d'Auril, les regimens François se randirent au deuant de sainte Bazille, celui de Sacromoro fut commandé de marcher au long de la riuere de Guaronne du costé de Marmande, où il y auoit vn moulin à eau, sur vn petit ruisseau qui se coule dans la riuere: ce Moulin estoit fortifié de quelques guarites, & les ennemis y auoient mis des soldatz pour le deffendre, à la faueur des bastions de la ville, qui estoient à cent pas, Du costé du Chasteau de sainte Bazille, marchoit le régimēt de Vic entre ses deux regimens marchoit celui du Fraisme. L'herault qui les auoit sonnez, ayant rapporté au Duc du Mayne, que le Sieur de Peulhe Gentil-homme de Bourgongne, qui commandoit dans la place, luy auoit respondu: qu'il ne recognoissoit que le Roy de Nauarre, pour Gouverneur de la Guiene: lequel les auoit mis dans ceste place, qu'ils estoient resolu de deffendre, Iceluy Duc commanda aux regimens qui estoient rangez en bataille de marcher auant contre la ville, les ennemis estoient dehors, loges en deux pars à deux cés pas de la ville, & dās des barricades & des retrāchemēs qu'ils auoient faictz dās lēs ruines de quelques Eglises, ils deschargerent leurs arquebusēs contre les nostres, lesquels feurēt mēez par noz chefs, de si bonne façon, que les ennemis se retirèrent le pas dans la ville,



& les nostres se logerent dans lesdictes ruines & retranchemens, Le Duc estoit presant exhortant les soldatz, & rendant graces à Dieu de leur voir si bien faire, lequel estant prié par aucuns Seigneurs de ne s'auancer & hazarder comme il faisoit, il leur respondit que Dieu le gardoit, le Sieur de Vic estant à la teste de son regiment, en gaignant les ruines d'une Eglise, où il se logea, y fut blessé d'une arquebuzade à la iambe, en mesme temps le Sieur Sacromoro, donna aussi du costé du moulin, Lequel il approcha de fort pres & y logea son regiment, ou deux iours apres l'on mena deux canons pour tirer quelques volée contre ce moulin, ce qu'estant fait il si logea. Lors qu'à la veuë du Duc du Mayne l'armée inuestissoit sainte Bazille, il fut prins du costé du moulin, par vn soldat de Sacromoro, vn Capitaine Huguenot qui estoit à la teste d'aucuns soldatz de la ville, combatans contre les nostres, le soldat estoit seconde d'un Gengil-homme, qui estoit aussi au sieur Sacromoro, & lequel pretendoit auoir part à la rançon du Capitaine Huguenot, qu'on disoit estre de deux mil escus, ce differend fut proposé au conseil du Duc du Mayne, d'autant que le soldat disoit que l'entiere rançon du prisonnier luy appartenoit surquoy les opinions furent diuerses, & en fin resolues par l'opinion du Duc, qui fust

telle, que si quelque troupe de soldatz, ou  
 gens d'armes telle quelle soit, est comman-  
 dée d'aler à la guerre: de ce que les coureurs  
 ou autres prennent, la rançon & butin est  
 commun, à toute la troupe des coureurs, &  
 du gros qui les suiët, mais lors que le chef de  
 l'armée y est en personne, qui prend prend,  
 cest à dire il faiët sien ce qu'il prend sans en  
 faire part à aucun: & partant la rançon du Ca-  
 ptaine prisonnier fut iugée appartenir au  
 seul soldat qui l'auoit prins. La ville de sainte  
 Basille, est assise en plaine sur la riuere de  
 Guaronne, qui coule d'un costé au long des  
 murailles, des autres costez au dehors des  
 murailles, elle estoit enuironnée de grandes  
 & profondes douues, & de cinq esperôs, ceux  
 des deux boutz estoient grands & capables de  
 receuoir bon nôbre de gens de guerre, Il y a-  
 uoit dans la ville mille soldats entre lesquels  
 on nommoit quarante Gentils-hommes ou  
 Capitaines, peu d'autres personnes y auoit il  
 que quelque femmes, il y falloit venir par trā-  
 chées, à fin de perdre peu des nostres, mais le  
 Duc auoit grand default de pionniers, car il  
 n'en y auoit point cinquante en l'armée, pour  
 la longueur de l'Hiuer, & la cherté des viures,  
 qui les auoit faiët mourir, ou contrains de  
 se desrobber, le Duc du Mayne quitta le  
 logis de la Mothe Mont gauzy, pour s'a-  
 procher de sainte Bizille. Apres l'auoir

inuesty, on fut huit iours atendant les Canons, & les bales qui estoient à Castetz, car en l'armee du Duc du Mayne il n'y auoit point de bales, pendant ce temps par le secours que fit le Sieur de la Mothe Mongaui, d'un grand nombre de payans, qui estoient emploiez la nuit a faire les tranchées, & le iour à couper la fassine pour les gabions, on approcha heureusement presque sans perte de soldatz de trois endroicts iusques à la contrescarpe du fossé, on auoit aussi posé vn regiment au dela de l'eau, pour en pescher qu'on ne peust entrer n'y sortir de la ville, & auoit on descouuert qu'au dela de l'eau des deux boutz de la ville on voioit fort auant dans leurs fossés & retranchemens, a cesté cause on descendit de ce costé deux coulourines, pour les battre dans leurs retranchemens, & les canons, qu'on auoit montés par batteaux contre mont de l'eau, estant descendus du costé de la ville, les assiegés demanderent à parlementer, le Sieur Mareschal de Matignon, se trouuant mal & gardant le lit, s'estoit logé au dela de l'eau à Melhan, ou le Duc du Mayne alloit presque chacun iours y tenir le conseil lesquels ce resolurent la capitulation qui fut que le Sieur de Peulhe Gouverneur de la ville & Chasteau sainte Bazille, pour le Roy de Nauarre, remettrait es mains de Monseigneur le Duc du Mayne ladicte ville & Chasteau:



ou de celuy qu'il voudroit nommer, pour en disposer ainsi qu'il iugeroit d'estre plus à propos pour le seruice du Roy, que sortant de ladicte ville les enseignes & taboureins seroient mis es mains de l'Herault d'armes de sa majesté, qu'il le Sieur de Peulhé, & autres Gentilz-hommes, & Capitaines sortiroient avec leurs armes, & chacun vn cheual, promettroient & signeroient de leurs mains de ne porter les armes de quatre mois, au deça la riuere de Dordogne contre le seruice du Roy, les autres soldatz qui voudroient faire pareille promesse sortiroient avec leurs armes & lamesche esteincte, & ceux qui ne le voudroient faire sortiroient avec leurs espées seulement, les Gentils-homme Capitaines & soldats seroient conduicts en toute seureté à Bergerac, ou à sainte Foy, & que soubz le bon plaisir du Roy, les habitans pourroient demeurer dans ladicte ville, à la charge d'y viure suiuant les Edicts de sa majesté, ce qu'estant accordé le dixhuitiesme d'Auril, la nuit suiuant il passa à trauers des gardes que le Duc auoit ordonnées sur leau vn batteau venant de Caulmont, qui est vne ville & Chasteau à deux lieues au dessus de sainte Bazille, au dela de la Garonne, & sur le bord de leau, ou tient sa garnison le Capitaine Viuans, dans le batteau il y auoit quarante soldatz & cent sacz de farine, aucuns



de ceux qui estoient dans le batteau, furent blessés d'arquebouzades que leur tirerēt les soldatz de Sacromoro, qui estoient engarde sur le bord de leau, mais les gardes qui auoient esté ordonnées dans les batteaux sur leau, n'y estoient point allées, se reposans sur l'accord de la capitulation. Ce secours fut receu dans la ville de sainte Bazille, toutesfois le Sieur de Peulhe manda au Duc du Mayne, qu'il tiendroīt l'accord de la reddition de la place, le requerant que le secours qui leur estoit venu, fust ramené en seureté à Caulmont, avec leurs armes ce qui fut accordé pour les soldatz: mais le batteau où ils estoient venus & les farines demeurèrent à l'armées: la charge de les ramener fut donnée au Baron de Vaillac avec sa compagnie de gens d'armes, Il estoit dict par la capitulation que les gens de guerre qui estoient dans sainte Bazille, promettoient & signeroient de leurs mains de ne porter les armes de quatre mois au deça la riuere de Dordogne, contre le seruice du Rny. Le Duc du Mayne enuoya le Samedi matin le President de Lestang, dans sainte Bazille pour aduertir les assiegés qu'ils sortiroient ce mesme iour sur le midy, à fin qu'ils se tinssent prestz, & aussi pour prendre leurs promesses suiuant le susdict article de la capitulation, à quoy faire iceluy de Lestang les trouuant reuechés, il leur remonstra

que c'estoit à eux d'auoir eue soing d'accomplir c'est article, & aduertit le Duc du refus qu'ils en faisoient, qui luy manda de leur dire qu'ils ne sortiroient point, & que s'ils ne le vouloient faire qu'il s'en reuint. Le sieur de Peulhe & quelques Gentishommes & Capitaines qui estoient dans sainte Bazille soubz signarent audict article de la capitulatio, mais ils s'excusoyent de faire signer les soldats, par ce que peu scauoient escrire, & disoient aussi n'auoir point les rolles de leurs gens de guerre, lesquels en fin ils baillerent au sieur de L'estang, signez au pied des rolles par les Capitaines, qui promettoient tant pour eux que pour leur soldats de ne porter les armes de quatre mois contre le seruice du Roy. Plustost qu'ils abandonnassent leurs bastions le sieur de Monberand entra dans la ville avec deux cens souyffes, lesquels il departit audits bastions, pour empescher que nos soldats ne les forçassent, & fissent desordre dans la ville à mesure qu'on mettoit à chacun bastion des souyffes, les ennemis se retiroient à la place de la ville de sainte Bazille, où estans tous assemblez, ils sortirent par la porte qui est du cousté de la riuiera, le Duc du Mayne estoit present qui les accompagna longuement, & puis les commit à la garde du sieur de Fontainiles de Gascongne, lequel s'en aquitta loyaument, & combien que les Sieurs

de saint Chameran & de Monberand Marech-  
 chaux de l'armée, fussent ordonnez de demeu-  
 rer dans la ville pour quelques iours, toutes-  
 fois il n'y eust homme ne femme qui y eust es-  
 té durant le siege, qui ne s'en alla avec les  
 gens de guerre, pour demolir le Chasteau, à  
 battre les murailles de la ville, remplir les dou-  
 ues, & aualler les rampars, on manda venir  
 grand nombre de paylans de Marmande, &  
 autres lieux circonuoisins. Les huguenots cit-  
 toiens de sainte Bazille & des enuiron. pre-  
 sentarent requeste au Duc pour estre mis en la  
 protection & sauuegarde du Roy, en faisant  
 profession de la Religion Catholique, & que  
 main leuée leur fust baillée de la saisie de leurs  
 biens, ausquels fust respondu, qu'abiurant  
 l'huguenotisme, faisant profession & viuant  
 suiuant les edicts du Roy, ils estoient mis sous  
 la protection & sauuegarde de sa Maiesté, in-  
 hibé & defendu de leur meffaire, & pour le  
 regard de la main leuée des saisies de leurs  
 biens renuoiez à la iustice. Lors le sieur Ma-  
 reschal de Matignon partit de Castets pour  
 venir à Melhan, le sieur de Pontcarre qui es-  
 toit avec ledict sieur Mareschal, rebroussa sur  
 le chemin de Bourdeaux, & logea pour se soir  
 à la maison d'un sien amy bourgeois de Bour-  
 deaux, d'où il partit le lendemain, & aiant pas-  
 sé la Guaronne coucha à Gironde, le matin  
 partant de la, tenant le chemin de la Reole,



fut prins prisonnier luy septiesme, par le Melon Gouverneur de Monsegur pour le Roy de Nauarre qui luy estoit en embusche, lequel le mena à Monsegur, & de la à Bergerac ou estoit le Roy de Nauarre. Quelques iours apres ceste prinse, vint à l'armee vn trompette du Roy de Nauarre, qui portoit des lettres du sieur de Pontcarré au sieur Marechal de Matignon, donnant aduis qu'il recepuoit bon traictement, & le requerât de luy faire'enuoier son equippage. Apres lá reddition de ceste place le sieur Marechal de Matignon contrainct de maladie se retira à Bourdeaux, & pareillemét le sieur D'alincour fils de Monsieur de Villeroy premier Secretaire d'estat, mais le Duc du Mayne ne changea point de logis durant huit iours qu'il donna ordre de faire embarquer & mettre sur des batteaux, les Canons & les munitions, car il n'y auoit atelage que pour quatre Canons. On estoit en doute du chemin que l'armée prendroit, si lon passeroit la Guaronne, pour aller assieger Caulmôt qui est de la la riuiere, deux lieues au dessus de sainte Bazille, ou si lon yroit assieger Monsegur, qui est aussi à deux lieues au dessous de sainte Bazille, tirant vers Bourdeaux, & sur le chemin de sainte Bazille à Castillon, & à sainte Foy, ledict sieur Marechal donna aduis au Duc par le sieur Euesque de Bazas qu'il estoit plus expediant pour le



seruice du Roy de mener l'armée à Monsegur qui autrepars, tant pour le temps qu'on perdoit à faire passer la riuere à l'armée, que aussi pour deux autres grandes considerations. La premiere que pour les reductions de sainte Bazille & de Castets, la riuere de Guaronne ne pouuoit estre libre de Marmande iusques à Bourdeaux si Monsegur n'estoit enleué des mains des huguenots, car la Garnison qui y seroit, courroit au long de la Guaronne iusques à Bourdeaux & à Marmande, l'autre point estoit que l'armée marchant contre-mont la riuere de guaronne & vers Tholozé, les finances pour soudoier l'armée qu'on enuoyeroit de Paris, ne pourroient venir seulement à l'armée, si les villes de Lalinde, de Bergerac, de sainte Foy, & de Castillon que les huguenots tiennent sur la Dordogne, n'estoient au prealable reduittes en l'obeissance du Roy, autrement à chasque fois que on enuoyeroit de l'argent, il faudroit vne seconde armée pour le conduire de Limoges iusques ou l'armée seroit: on auoit senty ses incommoditez, des lors qu'au mois de Feurier l'armée eust passé la Dordogne à Souliac & à Creisse, car des deux chemins de la poste de Paris à Bourdeaux ou en Languedoc, celuy de Poictiers d'Angoulesme est occupé & plain de dangiers, à raison des villes de saint Iean & de Pons que les huguenots

y tiennent, & mesme fraischement les huguenots auoient prins le Chasteau de Lusignan où ils tenoient Garnison, sur l'autre chemin, de la poste du cousté de Limoges & de Briue iusques à la on peut marcher en seureté, mais au sortir de Briue, il faut traueser le Viconté de Turenne iusques à Souliac, & puis passer entre les riuieres de Dordogne & de Lot, où est Figeac, Rossillon pres Cahors, de l'autre cousté est Monflanquin, & quelques bicoques que les huguenots tiennent, de sorte que pour trouuer chemin asseuré aux courriers, on dressa les postes de Limoges à Bourdeaux, entre les riuieres de l'isle & de la dronne, qui se ioignent à Coultres pres Libourne, doncques pour ouurir le chemin de paris à l'armée, il fut resolu qu'on atacqueroit Monsegur, & de la qu'on iroit assaillir les places rebelles qui sont sur la Dordogne, Pour ceste execution le vingtcinquiésme d'Apuril le Dnc partant de sainte Bazille avec l'armée, ce mesme iour l'escarmouche fust atacquee iusques aux portes de Monsegur, & les Regimens campez és enuiron de la ville, le Duc fit luy mesme son logis le plus proche qu'il peut des gens de pied campez. Apres la reduction de sainte Bazille, il partit de l'armee deux cens Gentilshômes qui suiuiet la Cornette du Duc, se retiras en leurs

maisons par faute de moiens, les batteaux qui portoient les Canons & les munitions estoient defendus iusques à Giròde, ou l'on mit le tout en terre, & cependant qu'avec le peu de chevaux d'atelage qui estoient en l'armée, le tout estoit conduit au camp, le Duc fit travailler aux tranchées & a faire les aproches. La ville de Monsegur est assise sur vn tertre qui n'est point commande, dans la plaine qui est d'un costé au pied de ce tertre court la riuère du Drot, dans les moulins qui sont sur ceste riuère on y logea quelques compagnies de gens de pied, pour empescher que les ennemis qui pouuoient venir de Bergerac, sainte Foy, Castillon & Genslac au camp, ne passassent commodement le Drot sur les pons & chaussées des moulins. Le plant de ceste ville est long, mais fort estroit du costé qui regarde vers la Reolle, le plus basté & plus spacieux de la ville est le costé qui regarde vers Duras, où il y a deux grosses tours sur vn portal de la ville, qui seruent de citadelle & pour defendre ses tours & le fossé, il auoit esté dressé au deuant vn grand esperon relevé de terre & de fassine, & l'endroit de la ville plus estroit estoit peu habité. A quelques maisons & granges qu'il y auoit, les ennemis depuis qu'il furent inueltis y mirent le feu, par ce que de ce costé le rochier empeschoit qu'on ne peüst faire des fossez au dehors de la ville, &



firét tout à trauers de la ville, deux retranche-  
 mens l'un dernier l'autre, dequoy le Duc e-  
 stant informé il resolut de dresser quatre bat-  
 teries, chacune de quatre Canons, l'une des-  
 quelles abattroit ce front estroit de la murail-  
 le de la ville, qui pouuoit auoir cent pas, à  
 l'un des coings il y auoit vn cul de lampe, qui  
 flanquoit par le dehors, & vne tour carrée qui  
 auoit autres fois serui de porte à la ville, les au-  
 tres batteries feurét assizes pour faire bresche  
 à la muraille, aux endroits qu'on pourroit  
 voir les ennemis par le dernier, des retranche-  
 ments, qui estoient au trauers par le dedans de la vil-  
 le, les choses étant ainsi ordonnées & les Canons  
 commencez de poser en leurs lieux, le mardy  
 dernier iour d'Apuril le Duc se trouua mal,  
 qui fust en fin vne fièvre double tierce, proue-  
 nant tant du grand travail qu'il prenoit étant  
 bien peu soulagé, car le sieur Mareschal de  
 Matignon estoit malade à Bourdeaux, le sieur  
 de Cessac estoit aussi demeuré malade à Esqui-  
 lon, que à cause du mauuais logis qu'il auoit  
 prins pour estre pres des tranchées, car il s'e-  
 stoit logé dans les ruines d'une maison brus-  
 lée, où il n'y auoit de couuert que pour met-  
 tre son liect en vn lieu fort humide, & encôres  
 lors qu'il pleuuoit on ne pouuoit loger son  
 liect en lieu qu'il n'y pleust. Durant les pre-  
 miers iours de sa maladie, il entendoit à l'a-  
 uancement de ce qu'il auoit ordonné, mais



son mal rangregeant, le sieur Forget pressa par lettres le sieur Mareschal de Matignon de venir à l'armée, le Dimanche quatriesme de May on porta le Duc sur des brancars à la commanderie de Rocquebrune, qui est à demie lieue de Monsegur, le lendemain ledict sieur Mareschal de Matignon arrivant à l'armée passa par Rocquebrune & vit le Duc, qui le pria de prendre le soing de l'armée & de ce siege, sans la maladie du Duc la batterie eust commencé ce lundy, le lendemain à la poincte du iour les canons commencerent de tirer, sur les trois heures apres midy il y eut trois breches faictes, la derniere desquelles tirant vers les tours de la citadelle estoit de plus de six vingts pas, à l'une des batteries commandoit le sieur d'alincourt fils du sieur devilleroy, il touchoit au regiment de Sacromoro de se loger au dessus de la breche où estoit le cul de lampe & ceste tour carrée du portal de ville, par ce qu'il estoit campé de ce cousté, la muraille de la ville y estant abattue, on vit le terrain de dedans si haut qu'il y falloit monter, il y avoit desia deux cens soldats de ce Regiment qui estoient couchez sur le ventre a vingt pas de la breche, Sacromoro avoit mandé aux canonniers & luy mesme estoit allé à la batterie pour faire lever vn flanc, ou il fust tiré

plusieurs coups de canons sans qu'il fust le-  
 ué, le quel le sieur Marechal vint en personne  
 recognoistre & emmena plusieurs ieunes  
 Gentils hommes qui estoient avec Sacromo-  
 ro pour l'accompagner à prendre se logis, la  
 nuict approchoit à ceste cause Sacromoro  
 manda son sergent maiour deuers le sieur Ma-  
 reschal, pour sçauoir s'il tascheroit de ce lo-  
 ger sur ceste breche, le sergent estant de re-  
 tour, il renuoia encores plusieurs fois de-  
 uers le sieur Marechal pour ce mesme effect,  
 & pour faire leuer le flanc en fin il donna  
 pour se loger sur ceste bresche, d'où il fust re-  
 poussé & blessé au bras droit, d'une Mous-  
 quetade qui luy brisa les os, il eust vne autre  
 mousquetade au Coste, la troisieme & plus  
 dangereuse à l'heyne. Le Capitaine du mont  
 Capitaine de la garde du Duc, & le Capitaine  
 ponsenat qui auoient chacun vne compa-  
 gnie en ce Regiment, y furent aussi blesez, &  
 le sieur de Thumilles. On tient que ce logis  
 eut peu estre emporté, si en mesme temps  
 qu'ils donnoient, les autres Regimens eussent  
 esté en bataille faisans semblant de donner,  
 pour diuertir les forces de la ville, qui toutes  
 feurent sur les bras de ceux qui se vouloient  
 loger, Aussi les bresches auoient esté faictes  
 pour cest effect, de voir les ennemis par le  
 dernier, & les assaillir en mesme temps.

de tous costez il fust tiré ce iour deux mille quatre cens coups de Canon le lendemain il ne se trouua en l'armée que trois cens balles & peu de poudre, le sieur Mareschal fit diligence d'en faire venir de Bourdeaux, car de cent milliers de poudre qui denoient estre en ceste armée, lors que le Duc & le Mareschal se departirent à Villebois, il en fust baillé trente milliers audit sieur Mareschal, & lors que le Duc partit de Villeneuve d'Agenois pour venir à Sainte Bazille, par defect d'atelage il laissa à Esquillon vne partie de ses poudres, desquelles il faisoit estat de se seruir au siege de Caumont, où il pensoit mener l'armée apres le siege de sainte Bazille. Les poudres & balles de Bourdeaux estant arriuées au camp on tira encores quelques coups, & le quinziesme de May il fust capitulé, que les ennemis rendroient leurs enseignes, sortiroient avec leurs armes, mesche esteinte, & seroient conduits en seureté. Le matin du siziesme de May le Duc partit de Rocquebrune, pour aller à Bourdeaux tacher de recouurer santé, le mesme iour ceux de Monsegur sortans de la ville suivant la capitulation, par la malice creance des soldats il en fust tué hui& vingts, les autres furent sauuez & conduits en lieu de seureté. Le Duc en sa maladie eust plusieurs accidens, qui faisoient doubter de sa conualescence, & aussi ce qu'on comptoit du Roy de Navarre

Naurre, qui durant ce siege se tint à Bergerac & à Sainte Foy à cinq lieues de l'armee, & de mandoit si le Duc viuoit encores. La Cour de Parlement de Bourdeaux, accompagna le Clergé en procession, pour implorer de Dieu la cōualefcēce du Duc, & Monsieur l'Archeuesque de Bourdeaux, ordonna qu'en toutes les Eglises de la ville, on feroit, chasque iour prieres à Dieu pour la santé du Duc. Pendant le siege de Montsegur, le Roy de Nauarre, qui en estoit si pres, ne fit dōner aucune alarme, à l'armee, mais craignant qu'on allast à luy, quelques iours auant la Capitulation de Mōtsegur, il se retira vers Pōs, & à la Rochelle. Le Duc arriuant à Bourdeaux le dixseptiesme de May, fut porté par deux Suisses, sur vne chaise à l'Aarcheuesché, ou Mōsieur de Bourdeaux luy auoit fait preparer son logis, vne heure apres qu'il y fust arriué, deux Presidens de la Court de Parlemēt, Quatre Cōseillers & le Procureur du Roy, le vindrent saluer au nō de la Court, lesquels quelques iours auant son arriuee auoient esté depputez par la Cour de Parlement à cest effect: ce mesme iour & sur la nuit Madame la Duchesse du Maine arriua à Bourdeaux, venant de Poitou, ou le Duc au mois de Nouembre, l'auoit laisser. Le subiect de son partement de Poitou estoit, pour voir l'estat des biens quelle à en Guienne, sur les riuieres de Dordogne, & de Garonne.



ne, qui s'aferment par an dix mil escus. L'arri-  
 uée du Duc du Maine en la ville de Bourde-  
 aux, bien qu'il ne fut accompagné que de ses  
 seruiteurs & domestiques, fit neantmoins pré-  
 dre des ombres & soupçons fort legierement,  
 dās laquelle ville pour estre voisine des prin-  
 cipalles terres du Roy de Nauarre, ledit Roy  
 à plusieurs seruiteurs pensionnaires, qui in-  
 uentoient tels soupçons lesquels vindrent si  
 auant, que pour les bruietz qui en couroient  
 & l'alarme qu'aucuns des principaux habi-  
 tans en prenoient, la Court de Parlement con-  
 sentit qu'on deputast les premiers d'entre eux  
 pour en parler au Duc du Maine, ausquels il  
 respondit, que où il estoit sa presence appor-  
 toit seureté, qu'avec peu de patience la mali-  
 ce ou l'imbecilité d'esprit de ceux qui semoiēt  
 telz bruietz se descouueroit, & depuis la mes-  
 me court ayant de rechef enuoyé vers le Duc,  
 pour excuser aucuns qu'on disoit estre au-  
 theurs de ces soupçons, le Duc dissimula pru-  
 demment ce qu'il en sçauoit : & pendant six  
 semaines qu'il y fut ses genereuses vertus &  
 debonnairetez rauirent ce peuple en telle ad-  
 miration, qu'il laissa gravée dans leurs cœurs  
 vne heureuse memoire de son nom : qui fut  
 aussi fauorisée par l'arriuée en poste à Bour-  
 deaux, d'un Gentil-homme depeché par le  
 Roy pour visiter le Duc en sa maladie, au-  
 quel il apporta vne lettre escrite de la main  
 de sa Majesté, le subiect de laquelle rappelle-

roit demy chemin du Tumbeau, vne ame des-  
 sireuse de la bonne grace de son Prince, &  
 bien zelée à son seruice: ladicte lettre ferma  
 la bouche à ses suppostz de Huguenotz, qui  
 murmuroient assez hault que le Roy soupçon-  
 noit & obseruoit les comportemens du Duc  
 du Maine, & qu'il estoit entré en ceste guerre  
 plustost forceement que de volonté: ce que  
 sert de couleur d'excuse de ne seruir au Roy  
 en ceste armée, à ceux qui ont l'ame poltron-  
 ne huguenotte. Mais les lettres du Roy, que  
 ce Gentil-homme portoit à tous les seigneurs  
 qui estoient à l'armée, tesmoignoient le contē-  
 temēt que sa majesté auoit du seruice qu'ilsluy  
 faisoient pres du Duc du Maine, & la lettre  
 du Duc declairoit notoirement & l'intē-  
 tion de sa majesté au faiēt de ceste guerre, & le  
 gré qu'il sentoit au Duc du fidele deuoir qu'il  
 y faisoit la teneur de la lettre estoit, Mon Cou-  
 sin aiant entēdu vostre maladie, ie vous ay de-  
 pesché expres pour vous visiter de ma part,  
 & sçauoir comme vous portez. Car ie desire-  
 ray tousiours en meilleure occasion encores,  
 vo' tesmoingner ce que i'ay en vostre endroit  
 dans l'ame, mesmes me seruant ainsi que vous  
 faiētes, ce que ie ne pense pas estre besoing de  
 vous prier de continuer de faire, car ie me pro-  
 mettz trop de vostre affectiō, & de la cognois-  
 sance que vous auez de combien il est ne-  
 cessaire pour le seruice de Dieu & de

moy, mois ie vous asseureray bien que vous  
 ne faictes pas seruice à Prince ingrat, & qu'il  
 ne desire en vostre particulier tousiours le  
 vous monstret, comme il doit, Dieu vous cō-  
 serue, ainsi signé Henry, & au dessus, A Mon  
 Cousin Monsieur le Duc du Maine. Aux sie-  
 ges de sainte Bazille, & de Montsegur. Il y a-  
 uoit en l'armee les compagnies de gens d'ar-  
 mes des Sieurs de Boissourdâ, de Môt-luc, de  
 Poyânegouuerneur de Dacqs, de Barreuault, &  
 de quelques autres seigneurs de Gascogne, les  
 quels ce siege finy dirent que leurs gens d'ar-  
 mes demandoient congé de se retirer en leurs  
 maisons, pour recueillir leurs viures, autre-  
 ment les garnisons que le Roy de Nauarre à  
 en la Gascogne les traicteroient mal: Auf-  
 quels permettant de se retirer, on les chargea  
 d'aller à Esguillon prendre les munitions des  
 poudres qui y estoient, & les accompagner à l'ar-  
 mée, & en outre on ordonna cinq cens Har-  
 quebusiers pour ceste escorte, ils furent ius-  
 ques à Esguillon, mais ils n'eurent patience  
 que les munitions fussent chargées, & se reti-  
 rarent en leurs maisons. Il estoit party du Cap  
 treize Canons, qu'on auoit enuoyé par eau à  
 Bourdeaux pour les faire remonter de fust  
 & de Roües, qui ne pouuoient estre prestz  
 d'un mois: Car il falloit enuoyer aux forestz  
 couper le bois: Ceux de Gensac, qui est vne  
 petite ville appartenant au Roy de Nauarre à

deux lieues de Môtsegur tenue par les Huguenots craignât qu'ô allast à eux, p l'intermissiō du Sienr de Duras leur voisin traicterēt de mettre la ville en l'obeissāce du Roy. Le Sieur Marechal tenant la chose pour faicte, auoit prins le chemin de Tōneins & d'Esguillon, pour recouurer les pouldres, sur ce point le Viconte de Thurene qui s'estoit long tēps tenu à Nerac & en Gescongne arriuant à Gensac, y mit garnisō & empescha l'executiō de la Capitulation, pource que Mont-segur, n'estant plus à la deuotion des Huguenotz, ce lieu de Gensac leur duisoit grandement pour aller & venir de Bergerac à Montauban, ou en Gascongne par Clerac & Caumont, cestoit des-là à la fin du mois de May, & sur le point de la recolte des viures: Aceste causē les prouinces d'Aginois, de Condōmmois, d'Armagnac, & de la Gascongne, requirent le Sieur Marechal de Matignon d'y departir les susdictes cōpagnies de gendarmes, pour y tenir garnison aux despens des habitans, à fin de les fauoriser à faire la recolte ce qu'il fit: & sachant bien que l'armée ne pouuoit estre remployée, iusques à ce que les canons fussent remontez, il donna ordre d'assembler grande quantité de bledz, & de vins qui refouloient lors en Aginois, par ce qu'a raison de l'occupation de la Garonne, il n'en auoit esté trāsporté, fit charger le tout sur des batteaux, & à la faueur de



l'armée les fit passer deuant Caumont sans y rien perdre, & outre ce il y passa gande quantité de marchandise de Pastel appartenât aux marchans de Thoulouze, ce bled & ce vin, arri uât à Bourdeaux, accómoda Beaucoup la province & l'armée. Pendât qu'on assembloit ce bled, lediê Sieur Mareschal fit fortifier vne partie de la ville de Tounains, où il mit en garnison trois cens soldatz, pour empescher les cources que durant la recolte ceux de Cleirac ou de Caumôt eussent peu faire, le Duc estoit à Bourdeaux se fortifiant de sa maladie, & diligentant de faire apprester les canons, & de recouurer viures pour nourrir l'armée au siege de Castillon, & ce qui le trauailloit le plus, estoit le recouurement des finâces. Car l'argêt du troisieme mois du payement de l'armée qu'on attendoit il y auoit si long temps, n'estoit encores arriué qu'estoit cause qu'on deuoit encores aux gens de pied François, presque l'argêt d'un mois des deux qu'ó leur auoit promis de payer lors qu'ils feirent monstre auant le siege de sainte Bazille: à ceste occasiõ toute l'armée estoit en rumeur, & principalement les Suisses, l'esquels on entretenoit tous iours sur l'esperance de l'arriué de l'argent du troisieme mois, & ce pendant on donnoit cét escus par semaine à chasque Capitaine des Suisses. qui montoit à trois mil escus par sepmaine, mais cela escheoit si souuent, & si

promptement, & duroit tant, que le credit du Duc, du Secretaire Forget, & du General de Gourgues n'y pouuoit fournir, & estoit on pour ce regard en tresgrand ennuy : Car il y auoit d'autres grâds frais à l'armée, & desreceptes particulieres de Guienne on n'en pouuoit estre secouru, par ce que les places que les huguenots y tiennent, empeschent que les receueurs du Roy n'y leuent que peu. Le Duc du Mayne qui estoit arriué malade à Bourdeaux le dixseptiesme de May, se trouua dans quinze iours en estat d'aller a l'armée, le retour de laquelle & du sieur Mareschal de Matignon qui l'auoit mené à Touncins pour les causes que nous auôs dit, il attendit iusques au vingt cinquieme de Iuin, que le dit sieur mareschal reuint à Bourdeaux, à l'arriuée duquel les Canons se trouuarent prests à embarquer, & les prouisions faictes des munitions des viures pour la nourriture de l'armée. L'argent du troisieme mois estoit encores vers Limoges, que le Viconte d'Aubeterre conduisoit avec sa compagnie de gens darmes, & quelque Noblesse de Perigort, & cinq cens arquebuziers. La compagnie de gens d'armes du sieur de Boisdauphin estoit logée à Guitres, où il y a vne Abbaye qui y fait vn petit fort, & vn grand village mal aisé à garder & a defendre qu'avec beaucoup de gens. Le Roy de Nauarre accompagné du

Prince de Condé, & disoit on de quinze cens arquebusiers & de cinq cens cheuaux & bref de toutes les forces qu'il auoit en Poictou, Xaintonge & Angoumois, & qui s'y estoient retirez des autres prouinces, auoit assiegé & forcé, quelque petite bicoque, voisine d'une où de deux lieues de leurs retraictes de Pôs ou de S. Iehâ, lequel avec toutes ses forces approcha Guîtres de demy lieue, resolu d'enleuer, se logis de Guîtres & deffaire la compagnie de Boisdaphin. Le Duc du Mayne ayant aduis que le Roy de Nauarre marchoit de ce costé, y enuoya le sieur de Boisdaphin qui estoit pres de luy, & commanda que deux cens arquebusiers du Regiment du Cheualier Bandy, qui estoient a trois lieues de Guîtres s'y allassent ietter, dequoy le Roy de Nauarre ayant senty le vent, il ne voulut croire le Prince de Conde, qui desiroit d'assaillir ce logis, craignant ledict Roy, qu'ils y fussent aussi mal traictés, qu'ils auoient esté enuiron les festes de Pasques par le Regiment de Tiercelin, lequel estant attaqué en plaine campagne par le Prince de Condé, le sieur de la Val & plusieurs Seigneurs de ce party y furent tuez, & mesme le Cheual que le Prince montoit y fust tué. Le Viconte de Turenne estoit à Bergerac, à sainte Foy & à Castillon, donnant ordre à ce qu'il pensoit necessaire pour soustenir le siege, & couroit le bruit qu'ils s'assem-

bloient pour se ioincre avec le Roy de Nauarre, & combatre le Viconte D'aubeterre, & prendre l'argent qu'il conduisoit. Ce qu'auoit beaucoup d'apparence qu'ils le deuoit faire, & en estoit le bruit dans Bourdeaux comme de chose ia executée, & sans moien de l'empescher : par ce que l'armée & toutes les forces estoient du costé de Tonneins, & ne pouuoit aller rencontrer lesdictes forces huguenottes, que venant passer à Bourdeaux & faisant un grand destour : car il n'y auoit bateaux sur la riuere de Dordogne pour la passer. Le Duc ayât tenté plusieurs moyens de faire aduancer quelques troupes de l'armée, pour en personne aller combattre ceste troupe du Roy de Nauarre, en fin il com manda au sieur de Boisdauphin d'aller avec ce qui estoit à Guittres au deuant du Viconte d'Aubeterre, ou le Roy de Nauarre & ses troupes ne parurent point. Cinq iours apres le retour du Sieur Mareschal à Bourdeaux. Le Duc du Mayne en partit, qui fust le premier iour de Iuillet pour aller à Libourne, faire preparer vn pont de bateaux sur la Dordogne pour le passage de l'armée, & voir ce que le Sieur de Montberant Mareschal du Camp, & le Seigneur Hercules Negro Piedmontois, auroient aduancé de faire pour seruir audict passage & au siege de Castillon, lesquels le Duc pour cest effect auoit enuoiez à Libourne



trois semaines avant qu'il partit de Bourdeaux Deux iours apres l'arriuée du Duc à Libourne, cest argent, qui venoit par Limoges y aborda, la ville de Libourne est assize ou les riuieres de l'isle & de Dordogne s'assemblent, L'armée ayant passé la riuere de Dordogne, sur le pont à Bateaux qui fust dressé pres Blagnac, les Canons & les poudres qui venoient de Bourdeaux conduites par le Marquis de Bessille & ses galleres estant abordées à Libourne, l'armée se trouuoit logée entre la riuere de l'isle qui vient de Perigueux & la riuere de Dordogne, sur laquelle les huguenots tiennent les villes de la Linde de Bergerac de sainte Foy, & de Castillon & entre ces deux riuieres à quatre lieues de Libourne & à deux lieues de Castillon, ils y tenoiēt Puynormant, qui est vn Chasteau tres fort appartenant au Roy de Nauarre, & dans lequel de par luy y auoit vn Capitaine Catholique, qui dès le mois de Ianuier lors que le sieur Marechal de Matignon reuenoit à Bourdeaux avec partie de l'armée, luy auoit donné quelque assurance de ne faire point la guerre. Il estoit à present necessaire de s'asseurer de ladicte place, à fin que l'armée estant au siege de Castillon n'en fust incommodée. Ce Capitaine estant mandé par vn trompette vint à Libourne, du quel on ne peut tirer autre chose, sinon qu'il estoit seruiteur du Roy de Nauarre, & qu'il

feroit ce que son dict maistre luy commanderoit. Plustost que le Duc partit de Libourne, il resolut de laisser Castillon & sainte Foy derriere, & mener l'armée, à Bergerac, proposant de l'inuestir avec les gens de pied suisses, & François, Reistres, Cauallerie, & Noblesse François, & que pour huit iours tout ce que il y auoit en l'armée de gens de guerre seroit Campé au plus pres dudit Bergerac, attendât que l'armée que Monsieur le Marechal de Biron auoit en Poictou arriua, ayant le Duc du Mayne eu aduis que le Roy auoit mandé audit sieur Marechal de Biron, qu'apres que il auroit fait quelques exploits en Poictou & Xaintonge (ce qu'on tenoit pour executé) qu'il enuoya ses forces audit Duc. Lequel sur la minuit ayant mandé le president de l'Estang pour le depecher vers le sieur Marechal de Biron, & luy ayant communiqué ce dessain, iceluy de l'estang representa qu'il pourroit trouuer ledict sieur de Biron engagé en quelque place qu'il ne pourroit bien promptement abandonner, où n'estant point bien esclercy de la volonté du Roy sur les occasions qui se pouuoient presenter es pays de Poyctou & Xaintonge, ce secours ne viendrait à temps & partant il faudroit retirer l'armée de deuant Bergerac, en outre representa ledict de l'Estang, que l'armée marchant par deuers Begerac,

il ne pouuoit mener que quatre Canons, Car il n'auoit atellage pour d'auantage, & ce seruoit on des riuieres pour le port des Canons, des poudres & des munitions des viures. Que les douze Canons & quatre Collourines, & les poudres, & bales, qui demeureroient à Libourne, ne pouuoient estre menées au siege de Bergerac qu'à plusieurs voyages, à chacun desquels on mettroit à l'aler où au retour huit iours, qu'à chasque voyage il faudroit vne tresgrande escorte, par ce qu'à faire dix lieues de chemin dudit pays, qu'il y a de Libourne à Bergerac, on passe entre Castillon sainte Foy Puynormant & Montrauel, où pour lors estoit reduict les plus grandes forces des huguenots: aussi n'y auoit il prouision de viures pour les gens de pied du Costé de Bergerac, n'y moien d'en y faire, par ce que les viures ne pouuoient venir que de la ville de Perigueux qui est à sept lieues de Bergerac, où l'armée auoit passé, & seiourné aux mois de Ianuier & Feurier, & vuidé les maguazins qui y estoient dressez, & touché bien auant aux greniers des particuliers, qui auoient aussi esté vuidéz par la cherté & necessité de l'année. Et pour le regard de ceste grande prouision de viures pour l'armée qui auoit esté conduite de Bourdeaux à Libourne, qu'elle y estoit portée par les riuieres, desquelles on ne se pouuoit ayder allant à present à Bergerac.

La naturelle affiette de ces places huguenotes, & le deffaut des chariots & des atellages, força le Duc à son grand regret de rompre ce dessein, & commencer par le siege de Castillon, pour lequel le Duc & le sieur Marechal partirent de Libourne l'onsiesme de Juillet, & vindrent loger à Sainteterre à trois lieues de Libourne & a demi lieue de Castillon, Le lendemain des la pointe du iour, les Regimés François furent rangez en bataille, dans vne plaine à la veüe de Castillon, où il fust présenté de Six à sept mil hommes, & n'y eust de tous les maistres de Camp & Capitaines, que le sieur de Canizy qui tinsent ce qu'ils auoient promis audiët sieur Duc & Marechal de ne presenter que les hommes qu'ils auroient, combien que lesdicts sieurs leur eussent en ce cas promis de leur donner & passer vingt cinq Soldats, sur chasque cent, car ils desiroient de sçauoir le nombre des gens de guerre qui estoient en l'armée, pour faire estat de ce qui y seroit. Les montres estant faictes, sur le champ par l'aduis dudiët sieur Marechal, il fust tiré des Regimens mille arquebusiers, lesquels conduits par Canisi & le Cluseau deux maistres de camp, donnèrent dans les fauxbourgs de Castillon, & se logearent au plus pres. Les aduenues fauorisoient les ennemis pour estre fort couuertes d'arbres, ce iour estoit extrêmement chaut, & la poussiere tresgrande, tou-



tesfois lesdicts fleurs Duc & Marechal ne bougearent du lieu où l'escarmouche estoit ataquée, iusques à ce que les Regimens y furent arriuez, & les soldats logez dans les logis qu'ils auoient gaignez, proches de ce bout de fausbourg qui n'estoit encores ruiné, & lequel les ennemis auoient fortifié, il fust trois heures apres midy quand on partit de la pour retourner à Sainte Terre, tous fort harassez du chaut de la poussiere & du ieune qu'on auoit fait, Car chacun y estoit allé en opinion que les montres seroient faictes sur les huit heures. Le lendemain lesdicts fleurs Duc & Marechal se logearent à sainte Mane à deux iects de pierre des gens de pied. La ville de Castillon est assize sur vne motte de terre esleuée au milieu d'une grande pleine, les murailles de la ville enuironnent toute ceste motte, la riuere de Dordogne d'un costé leur sert de fossé, au dessus de laquelle dans la ville, il y a vne autre motte de terre qui commande à la ville. Dans ladicte ville du costé de Montrauel & de sainte Foy estoit le Chateau du Viconte de Castillon, appartenant à Madame Du Mayne, lequel des le mois de Ianuier dernier les huguenots auoient ruiné, les faubourgs de Castillon estoient assis dedans la plaine sur le chemin de Libourne, & six fois plus grâds que la ville, Decorez de belles rues biē paucees, de belles maisons, & de fontaines

conduictes par tuiaux, les huguenots auoient abattu les maisons des Fauxbourgs, sauf environ vingt qui estoient au bout du fauxbourg, & les plus eslongnez de la ville tirant vers Libourne, dás lesquelles ils estoient retráchez les fortifications qu'ils auoient faictes à Castilló estoient cinq gráds esperons, aucuns desquels estoient doubles, & qui neátmoins estoient tous cōmandez de la ville, pour estre plus haute & assize sur la motte, l'un des esperons estoit ioignant la riuere du costé de sainte Foy, & s'entretenoient ces cinq esperons avec vn profond & grand fossé, qui les acompaignoit & regnoit tout au tour de la ville, iusques à la riuere du costé de Libourne dás les fosses il y auoit plusieurs cazemates posées bié à propos, vn corridour tout au lóg de la cōtrescarpe du fossé, & à ceste cōtrescarpe ils y auoient fait plusieurs flács qui flanquoyent par le dehors du fossé de l'une à l'autre, dans le fossé de ces esperons du costé de sainte Foy il y auoit de l'eau qui venoit bien auant, le fossé du costé de Libourne estoit sec, & sur le bord de la riuere de ce costé n'y auoit point d'esperon, par ce que dans la ville, mais bié auant sur le bord du fossé il y auoit vne Tour qui fláquoit au cinquiesme esperon, c'est esperon estoit posé au deuánt d'une des portes de la ville, & de laquelle il estoit séparé par vn fossé & vn pont leuis, l'endroit de la ville qui estoit à l'opposite de la riuere auoit en

veuë & à cent pas du fossé, vne haute monta-  
 gne, Couuerte d'un vignoble, lequel vigno-  
 ble s'estendoit iusques ausdits fosséz, la ville  
 de sainte Foy est assize au dela de Dordogne  
 à trois lieues de Castillon contremont la ri-  
 uiere & ioignant icelle, au deça de Dordoi-  
 gne à vne lieue Françoise de Castillon & à de-  
 my lieue de la riuiere est assize la Tour de  
 Montrauel, qui appartient à l'Archeuesque  
 de Bourdeaux, & est tenue par les huguenots,  
 le Chasteau de Püynormant & le fort de Min-  
 zac sont d'autre costé à deux lieues de Castil-  
 lon sur la riuiere del'isle, le Viconte de Tu-  
 réne estoit à sainte Foy, à Bergerac, à la Tour  
 de Montrauel, & presque à toutes heures d'as-  
 la pluspart des maisons des Gentilshommes  
 du pays, où il trouuoit plus de faueurs que l'ar-  
 mée du Roy. Il estoit accompagné des forces  
 des huguenots qui s'augmentoyent tous les  
 iours de celles de Gascongne, du Viconté de  
 de Turenne, & du costé de Montauban, à de-  
 my lieue de Castillon & du mesme costé au  
 long de la Dordogne, il y a la Motte Mont-  
 rael qui est vn gros bourg vis à vis de Mont-  
 rael, & sur l'aduenue de Castillon audiect  
 lieu de la Motte Montrauel, il y a vn ruisseau  
 non gayable & qui à les riués hautes qui vient  
 de Montrauel, & sur lequel au long de la Dor-  
 doigne il y a vn pont de pierre que les en-  
 nemis gardoient, pour assieger de toutes par  
 Castillon

Castillon il les failloit bloquer au dela la ri-  
 uiere, & aussi du costé du bonre de la mothe,  
 mais le mal estoit que du camp (qui estoit lo-  
 gé sur le cbemin de Libourne d'autant que de  
 ce seul endroict pouuoient venir les viures)  
 Pour venir à la Morrhe, il failloit passer au des-  
 sus de ceste môtage de vignoble, & faire plus  
 d'vn lieue François, le Duc du Maine & le  
 Sieur Mareschal furent à diuers iours reco-  
 gnoistre tous ces logis, & eussent logé quel-  
 que troupe à la Mothe n'eust esté que la  
 mettant au milieu des ennemis, les montai-  
 gnes & Colines qui estoient entre deux, o-  
 stoient le moien de les secourir si on les attac-  
 quoit cōme lon eut faict, Paquoy le quinzies-  
 me de Iuillet on commença de placer quatre  
 canons en deux lieux, pour desloger ceux qui  
 estoient dans ce bout de faulx-bours, auquel  
 les ennemis l'abandonnant mirent le feu,  
 ayant au parauāt à cest effect remply lesdictes  
 maisons de Paille & de fagots, & ce retire-  
 rent derriere vn tertre proche desdictes mai-  
 sons, qui estoit naturellement esleué depuis  
 pres la riuiere du costé de Libourne iusques  
 vis à vis du tiers esperon, sur lequel tertre ils  
 auoient faict des baricades, d'où aussi les no-  
 stres les deslogoient, sauf d'vn endroit tirant  
 vers la riuiere quilz opiniatrerent, & y faul-  
 sit tier quelques vollées de canons, encores n'e-  
 stoient les ennemis rescerrez dans la contre-



scarpe du fossé, car du costé de la riuere vers  
 Liborne, on trouua vne grande rue du faulx-  
 bours belle & large, paüée iusques à la riuie-  
 re, où il y auoit vne belle fôtaine bastie en grif  
 fon, qui rendoit grande quantité deau, & au  
 dessus de ceste fontaine & ioignant la riuere,  
 il y auoit vne terrasse fort haulte, qu'ils auoient  
 fortifiée. & à leur main droicte de ladicte ter-  
 rasse, il si trouua vne maison de pierre qui ad-  
 uançoit dans ladicte rue, à laquelle ilz y firent  
 des flancs. Il fut employé quelqs iours à placer  
 les canôs & atirer pour les desloger de ladicte  
 terrasse, & ce pëdât on trauailloit aux trachées  
 & à faire trois fors du costé du bourg de la Mo-  
 the, côme en triagle. Les deux plus petitz ad-  
 uancez vers la ville, vis à vis du pont de Pier-  
 re qui estoit sur le susdict ruisseau, lequel pô-  
 t estoit gardé par les ennemis. Le Duc ne bou-  
 geoit tout le iour desdicts fors iusques à ce  
 qu'ilz furët acheuez, & y faisoit venir en gar-  
 de deux compagnies de Suisses, il y auoit en  
 l'armée lors quelle vint deuant Castillon  
 huit cens pionniers, la plus-part du pays, qui  
 dans peu de iours se desroberent. Pour cer-  
 ner la ville du costé de la terre, il falloit tirer  
 les tranchées entre ceste montaigne du vi-  
 gnable & les esperons de la ville, pour ioin-  
 dre aux susdicts trois fors, & de tant que  
 par les vignez & chemins & couuertz qui y  
 estoient, les ennemis pouuoient venir de

Montrauel à Castillon, on resolut de faire les tranchées esgallement fortifiées des deux costez, & de cent pas en cent pas des fors qui flanquoient des deux costez de l'un à l'autre, & dans lesquels les gens de pied seroient logez à seureté, Mais auant que lesdicts forts & tranchées fussent acheuez, Il entra de nuict dās la ville de six à sept vīgrz soldatz, de quatre cens qui furent enuoyez portant poudre & mesche, lesquelz estans partiz de Montrauel auoiet passé par les vignes, & les chemins creus. Le Capitaine qui estoit en garde de ce costé, donna lalarme sans ce mettre en autre defence. Pendant qu'on trauailloit a ses tranchées on mit la main à les boucler aussi de la descente de la riuier, & dela de leau, on auoit faict venir deux pataches dans lesquels on mit quelque nombre de soldats, on feit aussi approcher les batteaux, & tout ce qui auoit seruy à faire le pont au passage de l'armée à Blagnac, La charge de faire passer de nuict ces batteaux vis à vis de la ville contremont l'armée, fust baillée au Sieur commandeur de la douze, lequel la premiere nuict qu'il y trauail-  
la, s'estant mis dās l'un des batteaux, ceux qui les montoient à la corde, ou de crainte des arquebusades qu'ō tiroit de la ville, ou qu'aucū d'entre eux en fussent frappez, couparent la corde, & le bateau où estoit ledict commandeur s'affabla du costé de la ville, d'où toutes-

fois on le retira dans vn petit bateau, leque  
la nuit suiuaute pourueut si bien au tout  
que les pataches, les bateaux & tout le bois  
qui seruoit au Pont furent montez au dessus  
de la ville, & à vne Mousquetade de ladicte  
ville, au milieu d'une isle qu'il y a, fust dressé  
le pont sur les bateaux: au deuant duquel fu-  
rent faictes au trauers de la riuere deux pal-  
lissades, & au dessus d'icelles pallissades les  
deux pataches armées de soldats estoient la  
nuit en sentinelle, au deuant de ce pont à bat-  
teaux fust aussi mis vne grosse chesne de fer,  
& à chacun des deux bouts du pont & dans  
L'isle, fut basti vn fort, Dans le fort du bout  
du pont au de la de l'eau, furent logées deux co-  
pagnies de gens de pied & vne colourine, de  
l'autre fort du bout du pont qui regardoit  
vers le bourg de la mothe, fust tiré vne tran-  
chée qui s'alloit ioindre au ruisseau, qui vient  
de Montrauel, & entre dans la Dordogne,  
qui faisoit vne isle renfermee du ruisseau de  
la riuere & desdictes tranches, où fust logé  
vn Regiment des suisses, & plus auant vers la  
ville & sur ce pont de pierre qu'on auoit le-  
ué des mains des ennemis estoient campe-  
des soldats François. Au de la la riuere vis à  
vis de la ville fust basti vn autre fort, dans le-  
quel on enferma vne maison qui si trouua,  
& y furent logez trois Canon, qui donnoient  
aux ennemis au long des retranchemens que

ils faisoient dans la ville, on mit encores hors dudi& fort vne Colourine, tous les soirs il entroit en garde audit fort, vne compagnie de suisses, qui partoioit du Regiment de Redit, qui estoit campé au pres du Duc. A ce fort commandoit le sieur de Duras. Tous lesquels fors tant du pont que de la l'eau auoient esté bastis à la diligence & conduite dudi& commandeur de la douze. Le Duc du Maine & le sieur Marechal pour estre à toutes heures dans les tranchées, s'estoi& logez à vne arque buzade de la ville au long de la riuere & derriere eux du long de la riuere estoient campez les suisses du Regiment de Redit, & les Reistres estoient aussi campez au derriere des suisses, la cauallerie François& estoit logee à sainte Mane où le Duc auoit premierement logé, laquelle alloit souuent à la Guerre. Et le sixiesme de Iuillet le sieur de Barraut Seneschal de Bazadois, ayant esté commandé d'aller à la Guerre du Costé de sainte Foy, avec sa compagnie de gens darmes, & celles des cheuaux legiers du sieur Marquis de Villars, que commandoit le sieur Carle de Birague, au retour de la Caualcade, ils rencontrerent dans le bourg de la Mothe le sieur de Bethune Gouverneur de Monflanquin, accompagné d'une bonne troupe de gens à cheval huguenots, entre lesquels estoient les enfans de feu Pille & de Beauuais la Noche, la charge y fust



faicte si rude par le sieur de Montardit Lieutenant de Barraut & par le Capitaine Chilaud de Perigueux, que Bethune, Beauuais & plusieurs des leurs y demeurarent morts sur la place, autres fort blesez, & cinq prisonniers, il y eust vn gendarme de Barraud tué, le sieur Carlo prisonnier son cheual tué & le dict de Montardit blessé. Castillon'estant ainsi reserré, on chassa les ennemis à Coups de canon de la terrasse, qu'ils auoient fortifiée au dessus de la fontaine, cela estant faict le commencement de ceste rue seruit de tranchée aux soldats, laquelle estant continuee outre le cinquiesme esperon, qui estoit le premier de ce costé, il falloit que les soldats chassassent les ennemis de la contrescarpe, à laquelle il y auoit des cazemates hors du fossé qui flanquoient de l'un à l'autre, il y faisoit si haut tant des arquebuzades qu'on tiroit des flancs de la contrescarpe & des esperons, que de dedans la ville & de la contrescarpe du fossé, que les soldats qui au demourant ce sont tousiours vaillamment portez, ne pouuoient sans asseuree perte de leurs vies, mettre le pied hors des tranchées. Neantmoins estant necessaire de Gagner ceste contrescarpe, le quatrieme d'aoust le Duc marchant pour y aller, les soldats prindrent courage, en chassarent les ennemis & se logearent sur la contrescarpe, sur laquelle on posa des garittes de

bois, qui auançoient dans le fossé pour voir dedans & y flanquer : & fust commencé sur le bord du fossé, & presque vis à vis de ce premier grand esperon vn Cauallier, auquel on trauailla en grande diligence, sur lequel furét posez quatre canons, & plus auant que le cauallier sur la main droite, fust dressé sur des pillotis de bois vn autre cauallier à trois estages, au dessus duquel se logeoiet des mousquetaires, qui voyoiet les ennemis dans la ville par le dernier de leur retranchement. Il y auoit deux autres batteries de canon, qui donnoient à la muraille de la ville depuis c'est esperon iusques à la tour qui estoit sur le coing au dessus de la riuiera, ladiete muraille auoit esté foudroyee par les canons iusques aux fondemens, mais par le dernier le terrain paroissoit plus haut que n'estoit la muraille, pour leuer les cazemates qui estoient dans le fossé, il fust aduisé d'y descendre vn canon, dequoy la charge fust donnee au sieur commandeur de la douze, qui l'executa contre l'opinion des commissaires de l'artillerie, & couurit le chemin de la descente des deux costez & par le dessus, pour le garentir des coups de pierres que les ennemis icettoient dru dans le fossé, lequel iusques à la contrescarpe estoit profond de la hauteur de deux picques, & du costé de la ville pour venir au dessus du terrain il estoit deux fois plus haut, Mais estroit au

respect de la profondeur : les Cazemates du fossé estant leuées , on commença de miner pour iecter à terre la tour, qui estoit de ce costé vers la riuere, les Canons de dessus les cauallier ayant commencé de tirer , on resollut qu'il falloit gagner L'esperon qui estoit vis à vis du Cavalier: le Cluseau qui estoit de garde a l'esperon & en sortoit sur le soir, desireux d'auoir c'est honneur y donna sans commandement, Pralin qui estoit aussi de garde ce iour pres du cluseau, ne voulut qu'il fust dict que son compaignon fust allé plus auant que luy, qui furent cause de la perte de beaucoup de soldats, & si ne peurent se loger sur l'esperon la nuit suiuant par le bon ordre que le Duc & le sieur mereschal y mirent, on se logea au dessus de c'est esperon sans perte des assaillâs, mais le logis y estoit fort estroit, & fort battu du flancq de l'autre esperon qui estoit à la main gauche, duquel neantmoins les soldats se couuroient & auançoient tousiours quelque peu de logis, toutesfois Les ennemis garderent aussi leurs logis, & chacun tenoit vne partye dudit esperon. Le viconte de Turenne peddant ce siege estant à sainte foy & à Montrauel, manda venir à luy de tous costez des forces, que menarent de Quercy le Viconte Gourdon, de Gascongne Viuans & Fabas, & pour faire venir les forces de son Viconte luy enuoya le Baron de Salagnac qui les ame-

na, estans assemblez, ceux qui en parloient avec plus d'apparence de verité disoient, qu'ils estoient trois mil hommes de pied, & enuiron trois cés cheuaux, Car le cōmun disoit qu'ils estoient six mil hommes de pied & cinq cens cheuaux, d'autre costé on asseuroit que le Roy de Nauarre viendrait avec ses forces du Poitou, de la Rochelle & de Xaintonge, pour tous ensemble faire leuer le siege. Le Duc du Mayne qui preuoioit la longueur du siege, & qui n'auoit pas vn sols pour donner aux soldats, cherchoit par tout moyens de Renforcer son armee de nouuelles forces, & le Roy luy ayant escript qu'il auoit mandé à Monsieur le Marechal de Biron de luy enuoyer celles qu'il auoit, il depescha vne douzaine de Courriers pour les faire aduancer, mais oncques il n'en vint vn seul soldat. Il enuoya aussi le President de l'Estant en Limosin, pour faire que la noblesse du Pays, & le sieur de hautefort Gouverneur d'iceluy assemblassent tout ce qu'ils pourroient de gens de guerre pour les mener à l'armee, ceux cy se remuerent vn peu, mais Castillon fust pris auant que ils fussent prests. Le Viconte de Turēne estoit cependant à Montrauel avec les susdictes forces, à ceste cause outre la compagnie de gens d'armes, & la Cornette des Reistres qui estoient toutes les nuicts en garde au haut & au pied de la Montagne du vignoble, toute l'armee



fust durant trois semaines presque toutes  
 les nuits en bataille, le sieur Marechal auoit  
 designé le Champ de bataille, & ordonné à  
 chacun sa place, & à fin que sans faire si grand  
 tour au dessus de la montagne, on peut aller  
 commodément aux ennemis, fust qu'ils  
 donnassent sur le Regiment des suisses qui e-  
 stoit logé vers le bourg de la Mothe, où au  
 pont, où à ceux qui estoient au dela la riuiere,  
 le Duc fist couper les vignes qui estoient au  
 dessous du mont du vignoble, & faire des  
 ponts en plusieurs lieux où passoient des rui-  
 seaux, & y auoit des fossez creus, & par ceste  
 esplanade de vignes, l'armee & la Cauallerie  
 pouuoit marcher en bataille, qui fust vne tres  
 belle inuention, car le viconte de Turenne  
 venant vne nuit avec toutes ces forces pour  
 donner sur le Regiment des suisses, qui estoit  
 campé à l'un des bouts du pont, entendant le  
 bruit des trompettes & des tambours de l'ar-  
 mee, qui marchoit à luy en bataille, il se retira.  
 Apres cela ledict Viconte passa au dela la ri-  
 uiere du costé de sainte foy, & vne nuit  
 marchant avec ses forces, estant bien pres du  
 pont a bateaux, il fist lascher contre le pont  
 vn moulin à bateaux qu'il faisoit conduire,  
 estant resolu de donner au deux fors de dela  
 leau. si le moulin faisoit ouuerture au pont,  
 La garde qui estoit sur le pont où le moulin  
 vint donner le destourna, la riuiere auoit lors

creu, & le moulin auoit passé au passage qu'on auoit laissé aux deux pallissades pour les pataches, vne autre nuit le Viconte y ramena encores ses forces, faisant conduire vn grád batteau, dás la moitié duquel il y auoit six vingts hommes armez de rondaches & cuirasses, du nombre desquels estoient chouppes, viuans & les meilleurs hommes qu'ils eussent: l'autre moitié dudit Batteau estoit plein d'artifices à feu, lequel estant à cinquante pas du pôt, ceux qui estoient dedans en sortirent & se mirent dans leurs forces qui auoient marché au long de la riuere, & donnant chemin au batteau vers le pont mirent le feu à tous ses artifices, esperant que ce batteau arriuant sous le pont le brusleroit, ceux qui estoient dans les Pataches avec des crochets de fert tirerent ce bateau à l'autre riué. Ainsi pour ce coup les ennemis s'en retournarent sans rien faire. Ces deux essais des ennemis furent le vingtroisième & vingtquatriesme d'aoust, le vingtsixieme ensuiuant on mit le feu à la mine, deux iours plustost qu'il n'estoit besoing, par ce qu'on entendoit que ceux qui trauailloient dans la ville pour l'euancer en estoient fort pres, toutesfois elle ne laissa de iecter par terre ceste tour, & de faire la montee quelque peu aysee, où incontinent les Capitaines menerent les soldats iusques à quatre pas du haut du fossé du dedans de la ville, où lon por-

la quantité de balles de l'ainne, de Sacqs pleins  
 de terre, de Baricques pour si loger, & des  
 Clayes pour se couvrir des pierres & des feus  
 que ceux de la ville iettoient en grande quan-  
 tité, qui blessarent plusieurs de nos soldats,  
 car ils estoient si pres des ennemis, que les  
 vns les autres se croisans les picquees ils les  
 coupoient à coups d'espee. Ce iour il fust tiré  
 plusieurs coups de Canon, & mesme de de la  
 l'eau où commandoit le sieur de Duras, on e-  
 stoit en doubte si les soldats garderoiét ce lo-  
 gis, par ce que le flancq de la moitié de l'esper-  
 ron que les ennemis tenoient les molestoit  
 fort, & de la plusieurs des nostres furent tuez,  
 la montee de ce logis estoit fort droicte, hau-  
 te & glissante, pour auoir esté toute la terre  
 esmeue par la mine, en outre les ennemis n'e-  
 stoient empeschez de l'enleuer & en chasser  
 les soldats, que par les canons qui les gardoiét  
 d'en approcher, lesquels ne pouuoient tirer  
 iustement la nuit, toutesfois les ennemis a-  
 uoient esté tant trauallez tout ce iour, que la  
 nuit ils eurent besoing du repos, & nos sol-  
 dats ne s'endormirent à fortifier leurs logis,  
 & sur tout à le couvrir des coups de pierres  
 & du flanc de l'esperon, & pour leuer ledict  
 flanc, & par mesme moyen l'esperon, on fit  
 traualier pour y faire vne fougade, Ce mesme  
 iour du matin deux soldats de la garde du Duc  
 estans montez sur le petit caualier à trois esta-

ges, y furent tuez d'un coup de piece qui vint de la ville, ceste piece fust aussi tost demontee par les canons du grand cauallier, & depuis ne tira mais sur la presdinee ce petit cauallier estant esbranlé par le vent des canons du grand cauallier, il renuersa, & tua deux soldats & en blessa plusieurs, à ceste cheutte les assiegez firent vne grande huee, pour demonstration de la ioye qu'ils en auoient, pour le dommage qu'ils en receurent la nuit suiuiante, les ennemis assaillirét le logis du haut de la bresche, & avec des crochets de fer antez au bout de gros barres, tirerét à eux les sacs pleins de terre, & les balles de laine, & avec grenades & autres artifices mirét le feu aux balles de laine, & aux barriques qu'ils ne pouuoient tirer, toutesfois les soldats n'abandonarét point ce logis & le raffrent plus fort qu'il n'estoit, les ennemis cherchant d'estre receuz à Capituler, le Ieudy & le Védredy vingthuietieime & vingt neufiesime d'Auril, il leur fut permis d'éuoier vers le Duc, Trois d'entre-eux sortirét qui demanderent des conditions si haultes, que ces deux iours ils furent renuoiez sans rien faire. Le Samedy ils accorderent que le Gouverneur, Maistre de Camp, Gentilz hommes, Capitaines, Lieutenans & Enseignes, sortiroient avec leurs espées & vn cheual s'ils en auoient, & les soldatz avec bastons blâcs seulement, pour estre conduictz en toute seu-



reté à Sainte Foy, apres auoir fait serment de ne porter les armes pour le Roy de Nauarre, N'y avec tel qu'il soit, contre le seruice du Roy iusques à quatre mois, & à cest effect seroit le rouble de leurs mains signé, tant pour ceux qui scauent signer que pour les autres qui ne le scauent faire, & à la charge qu'ils seroient tenuz faire remettre en liberté és mains de monseigneur le Duc du Maine, ceux de son armée qui auoient esté prins prisonniers, à scauoir le Vis Seneschal de Moute-limar, les sieurs Carle & Rodomôt de Birague, le Sieur Dupré, & le Capitaine Allenau, & que le Sieur de la Rocque Dubreil demeureroit quitte de la promesse qu'il auoit faite pour sa deliurace, & pour seureté de ce, & iusques à ce qu'il y eust esté satisfait, demeureroient douze Gentilz-hommes lesquels seroient nommez par Monseigneur le Duc & monsieur le Marechal dans l'armée à leur suite, toutes les pieces d'artilleries & munitions de guerre, & aucuns biens demeureroient en la ville, sans qu'ils s'en peut emporter aucune chose, pour les blesez & malades seroient baillez des batteaux, pour les porter seurement à Sainte Foy, les habitans de la ville demeureroient en icelle, pour estre traictez suiuant les Edicts du Roy, les enseignes & faulbours seroyent mis és mains du Herault d'armes du Roy, Les douze retenus furent Saignac gouuerneur

de Castillon, L'alain, le Baron de Chambaret, le Baron de Saint Angel, le frere du Baron de Salagnac, Fredeuille, Saint Ouin Capitaine des gardes du Viconte de Turaïne, Bassignac escuyer dudict Viconte, Bellier, Bours de Montmorancy, & Couranneau Maistre de Camp. Ayant Signé les articles de ceste capitulation, ils sortirent de la ville le Dimanche d'ernier iour d'Aoust, après que les douze qui deuoient demeurer furent luez. A la sortie le Sieur de Merville grand Seneschal de Guiéne, leur feist à tous leuer la main & iurer l'entretenement du contenu audict article, Ceux qui estoient sains furent accompagnez par le Duc iusques au bout du Pont, où il y auoit deux compagnies de gésdarmes qui les escorterent vers Sainte Foy Deux principales causes esmeurent, ou pour mieux dire forserent le Duc d'entendre à ceste capitulation, l'vne estoit la necessité qui auoit esté en l'armee depuis six mois, qui la rendoit si foible de soldats François, que le Duc craignoit de trouuer vn matin les tranches vuides de soldats, car il n'y auoit pas vn escu pour donner mesmes aux soldats blesez, dont le Duc mouroit de regret, & des moyens, qui en onze mois auoient esté enuoyez à ceste armee, il auoit fallu payer chacun mois les suisses, & estoient les François si pietres, que ceux des assiegez qui demeurerent prisonniers en l'armes

disoient, que voyant venir les soldats aux factions, ils pensoient que ce fussent les ragats de l'armee, par ce qu'ils estoient pieds nuds & presque sans abits, mais toutesfois qu'il n'estoit pas possible de voir de meilleurs soldats. L'autre cause estoit que la peste estant dans Castillon le Duc cherchoit d'empescher par tous moyens que les soldats n'y entraissent, à fin que elle ne se mit en l'armee, laquelle auoit eu ceste grace de Dieu, que pendant ce siege la santé y fust tresbonne, ce qu'il faut attribuer aux prieres & deuotions qui se faisoient à Bourdeaux pour le salut de l'armee, ce soing fust l'un des plus grands qu'eut le Duc sur le point de l'exécution de ceste Capitulation, & ayant cōmandé de dōner quartier aux cōpagnies des gens de pied, à fin de les desloger des trāchees ils ne permirent de leuer les enseignes, à ceste cause le Duc fit mettre des gardes sur les bresches, & aucuns lieux de la ville, pour empescher qu'on n'y entrast, & fit proclamer par le Camp que pour le grād danger de peste qui estoit dās la ville, nul n'eust à y entrer, à vēdre, n'y acheter chose quelcō que qui eust esté prinse dās la ville, sur peine de la vie. Neantmoins les assiegez ne furent si tost sortiz, que les soldatz grinpant par dessus les murailles, la ville en fut remplie, & tout ce qui si trouua semé par l'armee. De ceux qui sortoient, aucuns sur l'heure moururent de la contagion

contagion dans les fossez de la ville, qui furēt  
 incontinent desabillez par les Suisses qui s'en  
 vestirent, & l'un des deputez de la ville qui  
 estoit sorty durant les trois iours du traicté  
 de la redition, & auoit mangé & beu au logis  
 du Sieur de Cessac, y estant encores se trouua  
 faisi & frappé de peste, Neant-moins le Duc  
 du Maine deliberoit ayāt fait quelques iours  
 rafraichir son armée, d'employer ce qu'il re-  
 stoit de beau tēps auant l'hiuer pour assieger  
 Bergeracs s'il estoit secouru des deux moiés, le  
 premier des finances, car les assignations der-  
 nieres qu'il auoit receu pour l'étretenemēt de  
 l'armée de six pars les cinq se trouuent faul-  
 ses, le second si les gens qu'auoit monsieur le  
 Marechal de Biron le venoient trouuer sui-  
 uant la volonté & commandement du Roy,  
 car c'est chose inoüye qu'armée aye subsisté  
 onze mois cōme à fait celle de Guienne sans  
 estre refraichie des gēs de guerre, n'y mesmes  
 qu'apres vn siege elle n'aye eu besoing de raf-  
 fraichissement, & ceste cy depuis le mois d'A-  
 uril à continuellement assiegé & pris Castez,  
 Sainte Bazille, Monsegur, & Castillō, qui es-  
 toient quatre places desquelles les ennemis  
 faisoiet grād estat, & principalemēt de Castil-  
 lon où ils mirēt leurs meilleurs soldatz, qui es-  
 toyet huit cēs cinquāte harquebuziers lors  
 qu'ils furent assiegez, & depuis à deux fois  
 il en y entra cent cinquante, & disent à Bour-



deaux lors que le Duc y estoit, que hui & mois au parauant on y auoit publié quelques anciennes propheties qui predisoient, qu'aux enuirs de Castillon, il y auroit vn rencontre des Catholicques & Huguenotz, qui seroit la decision des mal-heurs de ce Royaume, comme autresfois en ce mesme lieu, la bataille qui fut donnée entre les François & Valabot chef des Anglois, auoit mis fin à la vieille querelle des François & des Anglois. Mais le Talabot y fut lors tué, les Anglois defaictz & la Guienne recourée, & croiez fermement que moyennant la grace de Dieu, si les Hueguenots si fussent presentez, ils eussent eu semblable traictement qu'aucunesfois leurs Confreres les Anglois y receurent, comme aussi de tous ceux qui s'enfermerent dans Castillon, il n'en sortit de sains, de malades, de pestiferez, de Maistres ou valletz, que deux cens cinquante, les soldats François qui auoient demeuré sept semaines entieres aux trenchées de Castillon, entendant qu'on les vouloit transporter en vn autre siege, & qu'il ne se parloit de faire montre, ou quelque pres d'argent aux Capitaines, se desbanderent en grosses troupes, & peult estre par l'aduis de leurs Capitaines, qui n'auoient moyen de les entretenir, & aucuns desquels quitterent leurs charges, tellement qu'il ne resta pas en l'armée neuf cens soldatz François, & de six

compagnie de gensdarmes qui estoient en l'armée, les quatre se retirerent, & les deux qui resterent attendoient leur payemēt pour faire le semblable: les Suisses feirent battre aux champs pour s'en aller, s'estans les Reistres & eux promis de s'accōpagner iusques en leurs pays, pour les arrester on emprunta de toutes les bourses particulieres de l'armée l'argent qui si trouua, & mesmes le Duc print le dernier escu de la bourse de Madame du Maine, qu'on bailla à ses estrangers, pour les arrester quelques iours, attendāt que le Roy eust faict entendre au Duc sa volonté, & sur l'aduis qu'il luy donna par le sieur d'Allincourt de l'estat de l'armée, promettant ledict Duc aux estrangers de les accompagner iusques sur la frontiere. Ayant obtenu du Roy congé de ce retirer de Guienne, qu'il enuoya demander par le Sieur de Saisseual, Car le Duc preuoyoit bien que si l'hiuer le surprenoit en Guienne, l'armée du Roy il seroit encores piremēt traitée qu'ellen'auoit esté par le passé, veu que le fōdz du Clergé pour l'entretienement de ceste armée estoit consommé, & que pour vne armée que ce Royaume auoit eu à entretenir durant l'esté en Guienne, il en auoit esté mis sus plusieurs autres depuis deux moys, sçauoir celle de Rouergues sous le Duc de Joyeuse celle de Prouence soubz le Duc d'Espernon, Celle de d'Aulphine soubz le gouuernemēt de la Val-

lette, celle de Poictou soubz Marechal de Biron, celle de l'Anguedoc soubz le Sieur Marechal de Joyeuse, A ceste cause la despence estant plus grande & le fondz moindre le Duc du Maine ne pouuoit esperer d'estre des mieux traictez, neantmoins attendant la responce du Roy il print le Chasteau de Puynormant appartenant au Roy de Nauarre qui fust razé, & vn autre fort aussi qu'on nommoit de Minzac, & vingtdeux des habitans de Castillon qui auoient soustenu le siege, furent enuoiez à la court de parlement de Bourdeaux puis executez à mort.

Ce petit discours du siege de Castillon, fera iuger par ceux qui le liront, que ce n'est point ce Castillon où autres fois vne compagnie de gens de pied logeoit outre le gré des habitans, comme aussi il se faisoit à Bergerac, auant qu'on y eust laissé prendre pied aux huguenots, lesquels ont tellement fortifié les places qu'ils tiennent, qu'il faut des armées Royales pour les rendre obeissantes, & n'a on pas veu, & leu, de plusieurs villages sur la frontiere, lesquels estans assez soudainement fortifiez, ont arresté la furie des grandes armées, de Charles cinquiesme. Mais aussi peut on obseruer, que ces rebellions, qui causent tant de ruines, n'aduient en Bourgongne, en Champagne, n'y aux autres prouinces où le Roy à esté fidellement seruy, aux prouin-

ces de Guienne, & de Languedoc, Dieu, n'y  
 le Roy, n'y sont recognus n'y obeys, leurs  
 noms mesprisez, & foulez aux pieds. Les re-  
 uenus de l'Eglise, & de sa Maiesté, y sont vsur-  
 pezz, & volez, & le peuple affligé & miné, &  
 s'il n'auoit plus d'obeissance aux autres pro-  
 uinces, qu'en celle la, sa Maiesté seroit sans  
 Royaume, laquelle Dieu veuille benir, &  
 luy faire la grace de se voir obey de  
 ses subiects & de leur donner  
 aussi heureux repos,  
 que ce Royau-  
 me en eust  
 onques.

F I N.





